

四庫全書

經部

欽定四庫全書

經部

陳氏禮記集說卷二

詳校官通政使_臣夢吉

給事中_臣溫常綬奏勅

總校官編修_臣王燕緒

校對官主事_臣雷純

謄錄監生_臣徐炘

欽定四庫全書

禮記集說卷二

元 陳皓 撰

檀弓上第三

劉氏曰檀弓篇首言子游及篇內多言之疑是其門人所記

公儀仲子之喪檀弓免焉仲子舍其孫而立其子檀弓曰何居我未之前聞也趨而就子服伯子於

門右

公儀氏仲子字魯之同姓也檀弓魯人之知禮者袒免本五世之服而朋友之死於他邦

病無主者亦為之免其制以布廣一寸從項中而前交於額又卻向後而繞於髻也適子死立適孫

為後禮也弓以仲子舍孫而立庶子故為過禮之

免以弔而譏之何居怪之之辭猶言何故也此時

未小斂主人未居阼階下猶在西階下受其弔故

弓弔畢而就子服伯子於門右而問之也免音

問居音姬亦為為去聲曰仲子舍其孫而立其子

適音的舍上聲斂去聲

何也伯子曰仲子亦猶行古之道也昔者文王舍

伯邑考而立武王微子舍其孫腩而立衍也夫仲

子亦猶行古之道也子游問諸孔子孔子曰否立

孫曰弓之問也猶尚也亦猶擬議未定之辭伯邑考

文王長子微子舍孫立衍或是殷禮文王之立武

王先儒以為權或亦以為遵殷制皆未可知否則以德

不以長亦如大王傳位季歷之意歟應氏曰檀弓默

而不復言子游疑而復求正非夫子明辨以示之孰知
舍孫立子之為非乎 舍上聲脂徒本切長上聲大音
泰復扶 又切 事親有隱而無犯左右就養無方服勤至死致

喪三年事君有犯而無隱左右就養有方服勤至死方

喪三年事師無犯無隱左右就養無方服勤至死心喪

三年

饒氏曰左右音佐佑非也左右即是方養不止飲食之養言或左或右無一定之方子之於親不分

職守事事皆當理會無可推托事師如事父故皆無方有方言左不得越右右不得越左有一定之方臣之事君當各盡職守故曰有方 朱氏曰親者仁之所在故有隱而無犯君者義之所在故有犯而無隱師者道之所在故無犯無隱也 劉氏曰隱皆以諫言父子主恩犯則為責善而傷恩故幾諫而不可犯顏君臣主義隱

則是畏威阿容而害義故匡救其惡勿欺也而犯之師
生處恩義之閒而師者道之所在諫必不見拒不必犯
也過則當疑問不必隱也隱非掩惡之謂若掩惡而不
可揚於人則三者皆當然也惟秉史筆者不在此限就
養近就而奉養之也致喪極其哀毀之節也方喪比方
於親喪而以義並恩也心喪身無衰麻之服而心有哀
戚之情所謂若季武子成寢杜氏之葬在西階之下請
喪父而無服也

合葬焉許之入宮而不敢哭武子曰合葬非古也自周
公以來未之有改也吾許其大而不許其細何居命之
哭劉氏曰成寢而夷人之墓不仁也不改葬而又請合
焉亦非孝也許其合而又命之哭焉矯偽以文過也
且寢者所以安其家乃處其家於人之冢上於汝安乎
墓者所以安其先乃處其先於人之階下其能安乎皆

不近人情非禮明矣

葬才浪切文去聲

子上之母死而不喪門人問諸子

思曰昔者子之先君子喪出母乎曰然子之不使白也喪之何也子思曰昔者吾先君子無所失道道隆則從而隆道污則從而污伋則安能爲伋也妻者是爲白也母不爲伋也妻者是不爲白也母故孔氏之不喪出母自子思始也

子上之母子思出妻也禮為出母齊衰杖期而為父後者無服心喪而已伯魚子上

皆為父後禮當不服者而伯魚乃期而猶哭夫子聞之曰甚而後除之此賢者過之之事也子思不使白喪出母正欲用禮耳而門人以先君子之事為問則子思難乎言伯魚之過禮也故以聖人無所失道為對謂聖人

之聽伯魚喪出母者以道揆禮而為之隆殺也惟聖人能於道之所當加隆者則從而隆之於道之所當降殺者則從而殺之污猶殺也是於先王之禮有所斟酌而隨時隆殺以從於中道也我則安能如是哉但為我妻則白當為母服今既不為我妻則白為父後而不當服矣子思是欲守常禮而不欲使如伯魚之加隆也禮為為去聲孔子曰拜而后稽顙顙乎其順也稽顙而后殺去聲

拜頌乎其至也三年之喪吾從其至者

此言喪拜之次序也拜拜賓也

稽顙者以頭觸地哀痛之至也拜以禮賓稽顙以自致謂之順者以其先加敬於人而后盡哀於己為得其序也頌者惻隱之發也謂之至者以其哀常在於親而敬暫施於人為極自盡之道也夫子從其至者亦與其易也寧戚之意朱子曰拜而后稽顙先以兩手伏地如常然後引首向前叩地也稽顙而后拜者開兩手而先

以首叩地却交手如常也
頤音懇易去聲

孔子既得合葬於防曰吾聞之

古也墓而不墳今丘也東西南北之人也不可以弗識

也於是封之崇四尺

孔子父墓在防故奉母喪以合葬墓塋域也封土為壟曰墳東西南

北之人言其宦遊無定居也識記也為壟所以為記識一則恐人不知而誤犯一則恐已或忘而難尋故封之

高四尺也

孔子先反門人後雨甚

句

至

句

孔子問焉曰

識音志

爾來何遲也曰防墓崩孔子不應三孔子泣然流涕曰

吾聞之古不脩墓

兩甚而墓崩門人脩築而後反孔子流涕者自傷其不能謹之於封築之

時以致崩圯且言古人所以不脩墓者敬謹之至無事於脩也

應三並去聲注胡犬切孔子哭子

路於中庭有人弔者而夫子拜之既哭進使者而問故

使者曰醢之矣遂命覆醢

子路死於孔悝之難遂為衛人所醢孔子哭之中庭師友之禮

也聞使者之言而覆棄家醢蓋痛子路之禍而不忍食其似也朱子曰子路仕衛之失前輩論之多矣然子

路却是見不到非知其非義而苟為也使去聲覆入聲難論並去聲

曾子曰朋友之墓

有宿草而不哭焉

草根陳宿是期年之外可無哭矣

子思曰喪三日而

殯凡附於身者必誠必信勿之有悔焉耳矣三月而葬

凡附於棺者必誠必信勿之有悔焉耳矣

附於身者襲斂衣衾之具

附於棺者明器用器之屬也方氏曰必誠謂於死者無所欺必信謂於生者無所疑

喪三年以

為極句亡則弗之忘矣故君子有終身之憂而無一朝

之患故忌日不樂

喪莫重於三年既葬曰亡中庸曰事亡如事存雖已葬而不忘其親所以

為終身之憂而忌日不樂也祭義曰君子有終身之喪忌日之謂也家宅崩毀出於不意所謂一朝之患惟其必誠必信故無一朝之患也或曰殯葬皆一時事於此一時而不謹則有悔惟其誠信故無此一時不謹之患

音洛

樂孔子少孤不知其墓殯於五父之衢人之見之者

皆以為葬也其慎也蓋殯也問於耶曼父之母然後得

合葬於防

不知其墓者不知父墓所在也殯於五父之衢者殯母喪也禮無殯於外者今乃在衢先

儒謂欲致人疑問或有知者告之也人見柩行於路皆以為葬然以引觀之殯引飾棺以輅葬引飾棺以柳翬

此則殯引耳按家語孔子生三歲而叔梁紇死是少孤也然顏氏之死夫子成立久矣聖人人倫之至豈有終母之世不尋求父葬之地至母殯而猶不知父墓乎且母死而殯於衢路必無室廬而死於道路者不得已之為耳聖人禮法之宗主而忍為之乎馬遷為野合之誣謂顏氏諱而不告鄭註因之以滋後世之惑且如堯舜瞽瞍之事世俗不勝異論非孟子辭而闕之後世謂何此經雜出諸子所記其閒不可據以為實者多矣孟子曰主癰疽與侍人瘠環何以為孔子愚亦謂終身不知父墓何以為孔子乎其不然審矣此非細故不得不辨

少去聲父音甫慎引去聲耶音郎曼音萬

鄰有喪舂不相里有殯不巷歌

說見曲禮相去聲見

喪冠不綏

冠必有筭以貫之以絃繫筭順頤而下結

音現後凡見其書倣此之曰纓垂其餘於前者謂之綏喪冠不綏蓋去飾也

有虞氏瓦棺夏

后氏塋周殷人棺椁周人牆置翬

瓦棺始不衣薪也塋周或謂之土周塋者

火之餘燼蓋治土為輒而四周於棺之坎也殷世始為棺椁周人又為飾棺之具蓋彌文矣牆柳衣也柳者聚也諸飾之所聚也以此障柩猶垣牆之障家故謂之牆翬如扇之狀有畫為黼者有畫為黻者有畫雲氣者多寡之數隨貴賤之等凡夏后華夏肆夏之夏上聲唯春夏之夏如字塋音稷翬音敵周人以殷

人之棺椁葬長殤以夏后氏之塋周葬中殤下殤以有

虞氏之瓦棺葬無服之喪

十六至十九為長殤十二至十五為中殤八歲至十一為

下殤七歲以下為無服之殤生未三月不為殤

長上聲夏后氏尚黑大事斂用昏

戎事乘驪牲用玄殷人尚白大事斂用日中戎事乘翰

牲用白周人尚赤大事斂用日出戎事乘騶牲用騂

禹以

治水之功得天下故尚水之色湯以征伐得天下故尚金之色周之尚赤取火之勝金也大事喪事也騶黑色

翰白色易曰白馬

翰如騶赤馬而黑鬣尾也

騶音元 穆公之母卒使人問於曾

子曰如之何對曰申也聞諸申之父曰哭泣之哀齊斬

之情饘粥之食自天子達布幕衛也繆幕魯也

穆公魯君申參

之子也厚曰饘稀曰粥幕所以覆於殯棺之上衛以布為幕諸侯之禮也魯以繆為幕蓋僭天子之禮矣 齊

音咨饘音綃

晉獻公將殺其世子申生公子重耳謂之曰子

蓋言子之志於公乎世子曰不可君安驪姬是我傷公之

心也

此事詳見左傳重耳申生異母弟即文公也蓋何不也明其讒則姬必誅是使君失所安而傷其心

也

重平聲蓋音

盡下節同傳去聲曰然則蓋行乎世子曰不可君謂我

欲弑君也天下豈有無父之國哉吾何行如之

重耳又勸其奔

他國而申生不從也何行如之言行將何往也

使人辭於狐突曰申生有罪不

念伯氏之言也以至于死申生不敢愛其死雖然吾君

老矣子少國家多難伯氏不出而圖吾君伯氏苟出而

圖吾君申生受賜而死再拜稽首乃卒是以為恭世子

也

狐突申生之傳辭猶將去而告違蓋與之永訣也申生自經而死陷父於不義不得為孝但得諡恭而已

疏曰註云伯氏孤突別氏者孤是總氏伯仲是兄弟之字字伯者謂之伯氏字仲者謂之仲氏故傳云叔氏其志諸乎又此下文云叔氏專以禮許人是一人之身字則別為氏也少難並去聲傳去聲魯人有

朝祥而莫歌者子路笑之夫子曰由爾責於人終無已

夫三年之喪亦已久矣夫子路出夫子曰又多乎哉踰

月則其善也

朝祥旦行祥祭之禮也朝祥莫歌固為非禮特以禮教衰廢之時而此人獨能行三

年之喪故夫子抑子路之笑然終非正禮恐學者致疑故俟子路出乃正言之其意若曰名為三年之喪實則二十五月今已至二十四月矣此去可歌之日又豈多有日月乎哉但更踰月而歌則為善矣蓋聖人於此雖不責之以備禮亦未嘗許之以變禮也魯莊公及宋人戰于乘丘縣

莫音暮

責父御卜國為右馬驚敗績公隊佐車授綏公曰未之
卜也縣責父曰他日不敗績而今敗績是無勇也遂死
之國人浴馬有流矢在白肉公曰非其罪也遂誅之士

之有誅自此始也

乘丘魯地戰在莊公十年縣卜皆氏也凡車右以勇力者為之大崩曰敗

績公墮車而佐車授之綏以登是登佐車也佐車副車也綏挽以升車之索也末之卜者言卜國微末無勇也
二人遂赴闕而死國人掌馬者及浴馬方見流矢中馬股間之肉則知非二子之罪矣生無爵則死無諡殷大夫以上為爵士雖周爵卑不應諡莊公以義起遂誅其赴敵之功以為諡焉
方氏曰誅之為義達善之實而不欲飾者也諡則因誅之言而別之有誅則有諡矣
乘去聲縣音玄責音奔父音甫隊音墜中去聲別必列

切曾子寢疾病樂正子春坐於牀下曾元曾申坐於足

童子隅坐而執燭

病者疾之甚也子春曾子弟子元與申曾子子也

童子曰華

而晄大夫之簣與子春曰止曾子聞之瞿然曰呼曰華而晄大夫之簣與曾子曰然斯季孫之賜也我未之能易也元起易簣曾元曰夫子之病革矣不可以變幸而至於旦請敬易之曾子曰爾之愛我也不如彼君子之愛人也以德細人之愛人也以姑息吾何求哉吾得正而斃焉斯已矣舉扶而易之反席未安而沒

華者畫飾之美好晄

者節目之平瑩簣簣也止使童子勿言也瞿然如有所驚也呼者歎而噓氣之聲曰童子再言也革急也變動也彼謂童子也童子知禮以為曾子未嘗為大夫豈可卧大夫之簣曾子識其意故然之且言此魯大夫季孫之賜耳於是必欲易之易之而沒可謂斃於正矣朱子曰易簣結纓未須論優劣但看古人謹於禮法不以死生之變易其所守如此便使人有行一不義殺一不辜而得天下不為之心此是緊要處又曰季孫之賜曾子之受皆為非禮或者因仍習俗嘗有是事而未能正耳但及其疾病不可以變之時一聞人言而必舉扶以易之則非大賢不能矣此事切要處正在此毫釐頃刻之間晚呼板切簣音責瞿音屢呼音吁革音亟論去聲

始死充充如有窮既殯瞿瞿如有求而弗得既葬皇

皇如有望而弗至練而慨然祥而廓然

疏曰事盡理屈為窮親始死孝

子匍匐而哭之心形充屈如急行道極無所復去窮急之客也瞿瞿眼目速瞻之貌如有所失而求覓之不得然也皇皇猶栖栖也親歸草土孝子心無所依託如有望彼來而彼不至也至小祥但慨歎日月若馳之速也至大祥則情意寥廓不樂而已方氏曰下篇述顏丁之居喪則言皇皇於始死言慨焉於既葬問喪則言皇皇於反哭所言不同者蓋君子有終身之喪思親之心豈有隆殺哉先王制禮略為之節而已故其所言不必同

音洛殺去聲

瞿音屢樂

邾婁復之以矢蓋自戰於升陘始也

魯僖

公二十一年與邾人戰於升陘魯地也邾師雖勝而死傷者多軍中無衣復者用矢釋云邾人呼邾聲曰婁故曰邾婁夫以盡愛之道禱祠之心孝子不能自己冀其復生也疾而死行之可也兵力之下肝腦塗地豈有再生之理復之用矢不亦魯婦人之髻而弔也自敗於臺

誣乎

婁音閭陘音形

魯婦人之髻而弔也自敗於臺

鮎始也

吉時以纓鮎髮凶則去纓而露其髻故謂之髻孤鮎之戰在魯襄公四年蓋為邾人所敗也

不以弔時家家有喪故髻而相弔也

方氏曰矢所以

施於射非所以施於復髻所以施於喪非所以施於弔

因之而弗改則非矣

髻

南宮緇之妻之姑之喪夫子

誨之髻曰爾母從從爾爾母扈扈爾蓋榛以為笄長尺

而總八寸

緇妻夫子兄女也姑死夫子教之為髻從從高也扈扈廣也言爾髻不可太高不可太廣

又教以笄總之法笄即簪也吉笄尺二寸喪笄一尺斬

衰之笄用箭竹竹之小者也婦為舅姑皆齊衰不杖則

當用榛木為笄也束髮謂之總以布為之既束其本末

而總之餘者垂於髻後其長八寸也

緇音叨從音總

扈音戶長音仗婦為去聲

孟獻子禪縣而不樂比御而不入夫子

曰獻子加於人一等矣

孟獻子魯大夫仲孫蔑也禪祭名禪者澹澹然平安之意大祥

後閏一月而禪故云中月而禪或云祥月之中者非小記云中一以上而祔亦謂閏一世也禮大夫判縣縣而不樂者但縣之而不作也比御而不入者雖比次婦人之當御者而猶不復寢也一說比及也親喪外除故夫子美之禪大感切縣

音玄比音界閏去聲

孔子既祥五日彈琴而不成聲

十日而成笙歌有子蓋既祥而絲屨組纓

有子孔子弟子有若也禮

既祥白屨無絢編冠素紕組之文五采今方祥即以絲為屨之節以組為冠之纓服之吉者也此二者皆譏其變吉之速然蓋者疑辭恐記者亦是得於傳聞故疑其辭也引孔子之事者以見餘哀未忘也

絢音句又音

拘死而不弔者三畏厭溺

方氏曰戰陳無勇非孝也其有畏而死者乎君子不立巖

牆之下其有厭而死者乎孝子舟而不游其有溺而死
者乎三者皆非正命故先王制禮在所不弔 應氏曰
情之厚者豈容不弔但其辭未易致耳若為國而死於
兵亦無不弔之理若齊莊公於杞梁之妻未嘗不弔也
愚聞先儒言明理可以治懼見理不明者畏懼而不
知所出多自經於溝瀆此真為死於畏矣似難專指戰
陳無勇也或謂闕很亡命 子路有姊之喪可以除之矣
曰畏 厭音壓陳音陣

而弗除也孔子曰何弗除也子路曰吾寡兄弟而弗忍
也孔子曰先王制禮行道之人皆弗忍也子路聞之遂
除之 行道之人皆有不忍於親之心然而 太公封於營
遂除之者以先王之制不敢違也

丘比及五世皆反葬於周君子曰樂樂其所自生禮不

忘其本古之人有言曰狐死正丘首仁也

太公雖封於齊而留周為

太師故死而遂葬於周子孫不敢忘其本故亦自齊而反葬於周以從先人之兆五世親盡而後止也樂生而敦本禮樂之道也生而樂於此豈可死而倍於此哉狐雖微獸丘其所窟藏之地是亦生而樂於此矣故及死而猶正其首以向丘不忘其本也倍本忘初非仁者之用心故以仁目之疏曰周公封魯其子孫不反葬於周者以有次子在周世守其采地春秋

周公是也

比音界下樂音洛首去聲

伯魚之母死期

而猶哭夫子聞之曰誰與哭者門人曰鯉也夫子曰嘻

其甚也伯魚聞之遂除之

伯魚之母出而死父在為母期而有禫出母則無禫伯魚

乃夫子為後之子則於禮無服期可無哭矣猶哭夫子所以歎其甚期音基與平聲嘻音希為母為去聲

舜葬於蒼梧之野蓋三妃未之從也季武子曰周公蓋

祔

天子以四海為家南巡而崩故遂葬蒼梧之野疏云舜長妃娥皇無子次妃女英生商均次妃癸比生二

女霄明燭光三妃後皆不從舜之葬此記者言合葬之事古人未有因引季武子之言謂自周公以來始祔葬

也書陟方乃死蔡氏曰史記舜崩於蒼梧之野孟子言卒於鳴條未知孰是今零陵九嶷有舜冢云曾子

之喪浴於爨室

士喪禮浴於適室無浴爨室之文舊說曾子以曾元辭易簣矯之以謀儉然反

席未安而沒未必有言及此使果曾子之命為人子者亦豈忍從非禮而賤其親乎此難以臆說斷之當闕之

以俟知者適音的斷丁玩切

大功廢業或曰大功誦可也

業者身所習如學舞

學射學琴瑟之類廢之者恐其忘哀也誦者口所習稍暫為之亦可然稱或曰亦未定之辭也子張病

召申詳而語之曰君子曰終小人曰死吾今日其庶幾

乎

申詳子張子也終者對始而言死則漸盡無餘之謂也君子行成德立有始有卒故曰終小人與羣物同

朽腐故曰死疾沒世而名不稱為是也子張至此亦曾自信其近於君子也語去聲幾平聲行為並去聲曾

子曰始死之奠其餘閣也與

始死以脯醢醴酒就尸牀而奠于尸東當死者之肩

使神有所依也閣所以度置飲食蓋以生時度閣上所餘脯醢為奠也度音已又音詭

曾子曰小

功不為位也者是委巷之禮也子思之哭嫂也為位婦

人倡踊申詳之哭言思也亦然

委曲也曲巷猶言陋巷細民居於陋巷不見禮

儀而鄙朴無節文故譏小功不為位是曲巷中之禮也言思子游之子申詳妻之昆弟也馬氏曰凡哭必為

位者所以叙親疎恩紀之差嫂叔疑於無服而不為位故曰無服而為位者惟嫂叔蓋無服者所以遠男女近似之嫌而為位者所以篤兄弟內喪之親子思哭嫂為位婦人倡踊以婦人有相為娣姒之義而不敢以己之無服先之也至於申詳之哭言思亦如子思蓋非禮矣妻之昆弟外喪也而既無服則不得為哭位之主矣記曰妻之昆弟為父後者死哭之適室子為主袒免哭踊夫入門右由是言之哭妻之昆弟以子為主異於嫂叔之喪也以子為主則婦人不當倡踊矣差楚宜切遠去聲為娣為去聲先去聲

古者冠縮縫

今也衡縫故喪冠之反吉非古也

疏曰縮直也殷尚質吉山冠皆直縫直縫

者辟積褊少故一一前後直縫之衡橫也周尚文冠多辟積不一一直縫但多作褊而并橫縫之若喪冠質猶踈辟而直縫是與吉冠相反時人因言古喪冠與吉冠反故記者釋之云非古也止是周世如此耳古則吉凶

冠同直縫也

衡音橫辟

曾子謂子思曰伋吾執親之

喪也音璧襦音軌并去聲

喪也水漿不入於口者七日子思曰先王之制禮也過

之者俯而就之不至焉者跂而及之故君子之執親之

喪也水漿不入於口者三日杖而后能起

三日中制也七日則幾於

減性矣有扶而起者有杖而起者曾子曰小功不稅則

是遠兄弟終無服也而可乎

稅者日月已過始聞其死追而為之服也大功以上

則然小功輕故不稅曾子據禮而言謂若是小功之服

不稅則再從兄弟之死在遠地者聞之恒後時則終無

服矣其可乎

疏曰此據正服小功也小記曰降

而在總小功者則稅之其餘則否

稅他外切

伯高

之喪孔氏之使者未至冉子攝束帛乘馬而將之孔子

曰異哉徒使我不誠於伯高

攝貸也十箇為束每束五兩蓋以四十尺帛從兩頭

各卷至中則每卷二丈為一箇束帛是十箇二丈今之五匹也乘馬四馬也徒空也伯高不知何人意必與孔子厚者冉子知以財而行禮不知聖人之心則于其誠不于其物也雖若自責之言而實則深責冉子矣使

乘並去聲

伯高死於衛赴於孔子孔子曰吾惡乎哭諸

兄弟吾哭諸廟父之友吾哭諸廟門之外師吾哭諸寢朋友吾哭諸寢門之外所知吾哭諸野於野則已疏於寢則已重夫由賜也見我吾哭諸賜氏遂命子貢為之

主曰為爾哭也來者

句

拜之知伯高而來者勿拜也

告死

曰赴與訃同已太也

馬氏曰兄弟出於祖而內所親者故哭之廟父友聯於父而外所親者故哭之廟門外

師以成己之德而其親視父故哭諸寢友以輔己之仁

而其親視兄弟故哭諸寢門之外至於所知又非朋友

之比有相趨者有相揖者有相問者有相見者皆泛交

之者也孔子哭伯高以野為太疏而以子貢為主君子

行禮其審詳於哭泣之位如此者是其所以表微者歟

方氏曰伯高之於孔子非特所知而已由子貢而見

故哭於子貢之家且使之為主以明恩之有所由也為

子貢而來則弔生之禮在子貢知伯高而來則傷死之

禮在伯高或拜或不拜凡以稱其情耳故夫子誨之如

此石梁王氏曰為爾哭也來者一句惡音烏為爾

為去聲稱去聲曾子曰喪有疾食肉飲酒必有草木之滋焉以

稱去聲

曾子曰喪有疾食肉飲酒必有草木之滋焉以

稱去聲

為薑桂之謂也

喪有疾居喪而遇疾也以其不嗜故加草木之味以為薑桂之謂一句乃記者釋

草木之滋亦或曾子稱禮書之言而自釋之歟

子夏喪其子而喪其明曾子弔

之曰吾聞之也朋友喪明則哭之曾子哭子夏亦哭曰

天乎予之無罪也曾子怒曰商女何無罪也吾與女事

夫子於洙泗之間退而老於西河之上使西河之民疑

女於夫子爾罪一也喪爾親使民未有聞焉爾罪二也

喪爾子喪爾明爾罪三也而曰爾何無罪與子夏投其

杖而拜曰吾過矣吾過矣吾離羣而索居亦已久矣

哭以

甚故喪明也洙泗魯二水名西河子夏所居索散也久不親友故有罪而不自知張子曰子夏喪明必是親

喪之時尚強壯其子之喪氣漸衰故喪明然而曾子之責安得辭也疑女於夫子者子夏不推尊夫子使人疑

夫子無以異於子夏非如曾子推尊夫子使人知尊聖人也方氏曰子夏不尊於師而尊於己不隆於親而

隆於子猶以為無罪此曾子所以怒之也然君子以友輔仁子夏之至於三罪者亦由離朋友之羣而散居之

久耳以離羣故散居也而喪喪明喪夫晝居於內問爾之喪去聲餘如字女音汝離去聲

其疾可也夜居於外弔之可也是故君子非有大故不

宿於外非致齋也非疾也不晝夜居於內內者正寢之中外謂中門

外也晝而居內似有疾夜而居外似有喪應氏曰致齋居內非在房閨之中蓋亦端居深處於寗奧之內耳

齊音齋

哭音竊

高子臯之執親之喪也泣血三年未嘗見齒

君子以為難

子臯名柴孔子弟子疏曰人涕淚必因悲聲而出血出則不由聲也子臯悲無聲

其涕亦出如血之出故云泣血人大笑則露齒本中笑則露齒微笑則不見齒

見音現

衰與其不

當物也寧無衰齊衰不以邊坐大功不以服勤

疏曰物謂升縷

及法制長短幅數也邊坐偏倚也喪服宜敬坐起必正不可著衰而偏倚也齊衰輕既不倚斬重不言可知大功雖輕亦不可著衰服而為勤勞之事也馬氏曰衰不當物則亂先王之制而後世疑其傳無衰則禮雖不行而其制度定于一猶可以識之故曰與其不當物也寧無衰

衰音催當去聲齊音咨著音勺

孔子

之衛遇舊館人之喪入而哭之哀出使子貢說驂而賻

之子貢曰於門人之喪未有所說驂說驂於舊館無乃

已重乎夫子曰予鄉者入而哭之過於一哀而出涕予

惡夫涕之無從也小子行之

舊館人舊時舍館之主人也駕車者中兩馬為服馬

兩旁各一馬為驂馬遇一哀而出涕情亦厚矣情厚者禮不可薄故解脫驂馬以為之賻凡以稱情而已客行無他財貨故也惡夫涕之無從者從自也今若不賻則是於死者無故舊之情而此涕為無自而出矣惡其如此所以必當行賻禮也舊說孔子遇主人一哀而出涕謂主人見孔子來而哀甚是以厚恩待孔子故孔子為之賻然上文既曰入而哭之哀則又何必迂其說而以為遇主人之哀乎說音脫鄉去聲惡去聲稱去聲為之為孔子在衛有送葬者而夫子觀之曰善哉為喪乎去聲

足以為法矣小子識之子貢曰夫子何善爾也曰其往也如慕其反也如疑子貢曰豈若速反而虞乎子曰小

子識之我未之能行也

往如慕反如疑此孝子不死其親之至情也子貢以為如疑則

反遲不若速反而行虞祭之禮是知其禮之常而不察其情之至矣夫子申言小子識之且曰我未之能行則

此豈易言哉識音志易去聲

顏淵之喪饋祥肉孔子出受之入彈琴

而后食之

彈琴而後食者蓋以和平之聲散感傷之情也

孔子與門人立拱而

尚右二三子亦皆尚右孔子曰二三子之嗜學也我則

有姊之喪故也二三子皆尚左

吉事尚左陽也凶事尚右陰也此蓋拱立而右

手在上也孔子蚤作負手曳杖消搖於門歌曰泰山其頽乎

梁木其壞乎哲人其萎乎旣歌而入當戶而坐子貢聞之曰泰山其頽則吾將安仰梁木其壞哲人其萎則吾

將安放夫子殆將病也遂趨而入

作起也負手曳杖反手卻後以曳其杖也

消搖寬縱自適之貌泰山為衆山所仰望而梁木亦衆木所仰而放者猶哲人為衆人所仰望而放致也放上聲

夫子曰賜爾來何遲也夏后氏殯於東階之上則猶在阼也殷人殯於兩楹之間則與賓主夾之也周人殯於西階之上則猶賓之也而丘也殷人也予疇昔之夜夢

坐奠於兩楹之間夫明王不興而天下其孰能宗予予

殆將死也蓋寢疾七日而沒

猶在阼猶賓之者孝子不忍死其親殯之於此示猶

在阼階以為主猶在西階以為賓客也在兩楹間則是主與賓夾之故言與而不言猶也孔子其先宋人成湯之後故自謂殷人疇發語之辭肯之夜猶言昨夜也夢坐於兩楹之間而見饋奠之事知是凶徵者以殷禮殯在兩楹間孔子以殷人而享殷禮故知將死也又自解夢奠之占云今日明王不作天下誰能尊已而使南面坐於尊位乎此必殯之兆也自今觀之萬世王祀亦其應矣孔子之喪門人疑所服

子貢曰昔者夫子之喪顏淵若喪子而無服喪子路亦

然請喪夫子若喪父而無服

以後章二子經而出言此所謂無服蓋謂吊服

加麻也疏云士弔服疑衰麻謂環經也五服經皆兩股
惟環經一股後章從母之夫疏云凡弔服不得稱服
方氏曰若喪父而無服
所謂心喪也從去聲
孔子之喪公西赤為志焉飾棺

牆置翬設披周也設崇殷也綢練設旒夏也

公西氏赤名字子華

孔子弟子也疏曰孔子之喪公西赤以飾棺榮夫子
故為盛禮備三王之制以章明志識焉於是素為褚
褚外加牆車邊置翬恐柩車傾虧而以繩左右維持之
此皆周之制也其送葬乘車所建旌旗刻繒為崇牙之
飾此則殷制又綢盛旌旗之竿以素錦於杠首設長尋
之旒此則夏禮也詩虞業維樅疏云懸鐘磬之處以
采色為大牙其狀隆然謂之崇牙練素錦也縹布廣終
幅長八尺旒之制也披彼義切綢音叨旒直小切識
音志虞音

巨樅音蹤

子張之喪公明儀為志焉褚幕丹質蟻結于

四隅殷士也

疏曰褚者覆棺之物若大夫以上其形似幄士則無褚公明儀尊其師故特為褚不

得為幄但似幕形故云褚幕以丹質之布而為之也又於褚之四角畫蚍蜉之形交結往來故云蟻結于四隅此殷禮士葬飾也覆去聲 子夏問於孔子曰居父母之仇如之何

夫子曰寢苫枕干不仕弗與共天下也遇諸市朝不反

兵而鬪

不反兵者不反而求兵言恒以兵器自隨 苦詩占切枕去聲朝音潮

曰請問居

昆弟之仇如之何曰仕弗與共國衛君命而使雖遇之不鬪曰請問居從父昆弟之仇如之何曰不為魁主人

能則執兵而陪其後

疏曰朝在宮門之內閤人掌中門之禁兵器但不得入中門耳其大

欽定四庫全書

卷二

詢衆庶在臯門之內則得入也設朝或在野外或在縣鄙鄉遂但有公事之處皆謂之朝兵者亦謂佩刀以上不必要是矛戟也方氏曰市朝猶不反兵則無所往而不執兵矣曲禮云兄弟之讎不反兵此言遇之不鬪者彼據不仕者言之

孔子之喪二三子皆經而出羣居

耳使從並去聲

則經出則否

弔服如麻者出則變之今出外而不免經所以隆師也羣者諸弟子相為朋友之服

也儀禮註云朋友雖無親有同道之恩相為服總之經帶亦弔服也故出則免之

易墓非古也

疏曰易謂芟治草木不使荒穢古者殷

子路曰吾聞諸

易音異

夫子喪禮與其哀不足而禮有餘也不若禮不足而哀有餘也祭禮與其敬不足而禮有餘也不若禮不足而

敬有餘也

有其禮而無其財則禮或有所不足哀敬則可自盡也此夫子反本之論亦寧戚之意

曾子弔於負夏主人既祖填池推柩而反之降婦人而

后行禮從者曰禮與曾子曰夫祖者且也且胡為其不

可以反宿也

劉氏曰負夏衛地也葬之前一日曾子往弔時主人已祖奠而婦人降在兩階之間

矣曾子至主人榮之遂徹奠推柩而反向內以受弔示死者將出行遇賓至而為之誓反也亦事死如事生之意然非禮矣柩既反則婦人復升堂以避柩至明日乃復還柩向外降婦人於階間而反行遣奠之禮故從者見柩初已遷而復推反之婦人已降而又升堂皆非禮故問之而曾子答之云祖者且也是且遷柩為將行之始未是實行又何為不可復反越宿至明日乃還柩遣奠而遂行乎疏謂其見主人榮已不欲指其錯失而給

說答從者此以衆人之心窺大賢也事之有無不可知其義亦難強解或記者有遺誤也所以徹奠者奠在柩西欲推柩反之故必先徹而後可旋轉也婦人降階間亦以奠在車西故立車後今柩反故亦升避也填音奠池音徹推他回切從去聲與平聲復遣並去聲從者又問諸子游曰禮與子

游曰飯於牖下小斂於戶內大斂於阼殯於客位祖於庭葬於墓所以即遠也故喪事有進而無退曾子聞之

曰多矣乎子出祖者

從者疑曾子之言故又請問於子游也飯於牖下者尸沐浴之後以

米及貝實尸之口中也時尸在西室牖下南首也士喪禮小斂衣十九稱大斂三十稱斂者包裹斂藏之也小斂在戶之內大斂出在東階未忍離其為主之位也主人奉尸斂于棺則在西階矣掘肆於西階之上肆陳也

謂陳尸於坎也置棺于殯中而塗之謂之殯及啓而將葬則設祖奠於祖廟之中庭而後行自牖下而戶內而昨而客位而庭而墓皆一節遠於一節此謂有進而往無退而還也豈可推極而反之乎多矣乎子出租者多猶勝也曾子聞之方悟已說之非乃言子游所說出祖之事勝於我之所說出祖也飯上聲首稱離並去聲

曾子襲裘而弔子游裼裘而弔曾子指子游而示人曰

夫夫也為習於禮者如之何其裼裘而弔也主人既小

斂袒括髮子游趨而出襲裘帶經而入曾子曰我過矣

我過矣夫夫是也

疏曰凡弔喪之禮主人未變服之前弔者吉服吉服者羔裘玄冠緇衣素

裳又袒去上服以露裼衣此裼裘而弔是也主人既變服之後弔者雖著朝服而加武以經武吉冠之卷也又

掩其上服若是朋友又加帶此襲裘帶經而入是也
方氏曰曾子徒知喪事為凶而不知始死之時尚從吉
此所以始非子游而終善
之也
下夫如字下同
子夏既除喪而見子之琴和

之而不和彈之而不成聲作而曰哀未忘也先王制禮

而弗敢過也子張既除喪而見子之琴和之而和彈之

而成聲作而曰先王制禮不敢不至焉

均為除喪而琴有和不和之異

者蓋子夏是過之者俯而就之出於勉強故餘哀未忘
而不能成聲子張是不至者跂而及之故哀已盡而能
成聲也
見音現子上聲上和去聲下和如字下同強上聲
司寇惠子之喪子游為

之麻衰牡麻經文子辭曰子辱與彌牟之弟游又辱為

之服敢辭子游曰禮也

惠子衛將軍文子彌牟之弟惠子廢適子虎而立庶子故子游

特為非禮之服以譏之亦檀弓免公儀仲子之意也麻衰以吉服之布為衰也牡麻經以雄麻為經也麻衰乃吉服十五升之布輕於弔服弔服之經一股而環之今用牡麻絞經與齊衰經同矣鄭註云重服指經而言也文子初言辱為之服敢辭者文子退反哭子游趨而就辭其服也為去聲適嫡同

諸臣之位文子又辭曰子辱與彌牟之弟游又辱為之

服又辱臨其喪敢辭子游曰固以請文子退扶適子南

面而立曰子辱與彌牟之弟游又辱為之服又辱臨其

喪虎也敢不復位子游趨而就客位

次言敢辭者辭其立於臣位也此時

尚未喻子游之意及子游言固以請則文子覺其譏矣於是扶適子正喪主之位焉而子游之志達矣趨就客位禮之正也疏曰大夫之賓位在門東近北家臣位亦在門東而南近門並皆北向適嫡同將軍

文子之喪既除喪而后越人來弔主人深衣練冠待于廟垂涕洟子游觀之曰將軍文氏之子其庶幾乎亡於

禮者之禮也其動也中

將軍文子即彌牟也主人文子之子也禮無弔人於除喪之後

者亦無除喪後受人之弔者深衣吉凶可以通用小祥練服之冠不純吉亦不純凶廟者神主之所在待而不迎受弔之禮也不哭而垂涕哭之時已過而哀之情未忘也庶幾近也子游善其處禮之變故曰文氏之子其近于禮乎雖無此禮而為之禮其舉動皆中節矣疏曰深衣即間傳所言麻衣也制如深衣緣之以布曰麻

衣緣之以素曰長衣緣之以采曰深衣練冠者祭前之冠若祥祭則編冠也始死至練祥來弔是有文之禮祥後來弔是無文之禮言文氏之子庶幾堪行乎無於禮文之禮也動舉也中當於禮之變節也亡無通中去

聲幼名冠字五十以伯仲死諡周道也

疏曰凡此之事皆周道也又殷

以上有生號仍為死後之稱更無別諡堯舜禹湯之例是也周則死後別立諡朱子曰儀禮賈公彥疏云少

時便稱伯某甫至五十乃去某甫而專稱伯仲此說為是如今人於尊者不敢字之而曰幾丈之類冠去聲

經也者實也

麻在首在要皆曰經分言之則首曰經要曰帶經之言實明孝子有忠實之心也首

經象緇布冠之缺項要經象大帶又有絞帶象革帶齊衰以下用布朱子曰首經大一握是拇指與第二指

一圓要經較小絞帶又小於要經要經象大帶兩頭長垂下絞帶象革帶一頭有弭子以一頭串於中而束之

要平聲

掘中雷而浴毀竈以綴足

疏曰中雷室中也死而掘室中之地

作坎以床架坎上尸於牀上浴令浴汁入坎也死人冷強足辟戾不可著屨故用毀竈之覺連綴死人足令直

可著屨也

及葬毀宗躡行出于大門殷道也學者行之

綴音拙

疏曰毀宗毀廟也殷人殯於廟至葬柩出毀廟門西邊牆而出于大門行神之位在廟門西邊當所毀宗之外生時出行則為壇幣告行神告竟車躡行壇上而出使道中安穩如在壇今向毀宗處出仍得躡行此壇如生時之出也學於孔子者行之效殷禮也

子柳之母死子碩請具子柳曰何

以哉子碩曰請粥庶弟之母子柳曰如之何其粥人之

母以葬其母也不可既葬子碩欲以賻布之餘具祭器

子柳曰不可吾聞之也君子不家於喪請班諸兄弟之

貧者

子柳魯叔仲皮之子子碩之兄也具謂喪事合用之器物也何以哉言何以為用乎謂無其財也鄭

云粥謂嫁之也妾賤取之曰買布錢也不家於喪惡因死者而為利也班猶分也不粥庶弟之母者義也班兄弟之貧者仁也夫欲粥庶母以治葬則乏於財可知矣而不家於喪之言確然不易古人之安貧守禮蓋如此

惡粥音育去聲

君子曰謀人之軍師敗則死之謀人之邦邑

危則亡之

應氏曰衆死而義不忍獨生焉得而不死國危而身不可獨存焉得而不亡

公叔

文子升於瑕丘蘧伯玉從文子曰樂哉斯丘也死則我

欲葬焉蘧伯玉曰吾子樂之則瑗請前

二子皆衛大夫文子名拔伯玉

名璣 劉氏曰伯玉之請前蓋始從行於文子之後及
聞文子之言而惡其將欲奪人之地自為身後計遂譏
之曰吾子樂此則我請前行以去子矣示不欲與聞其
事也可謂長於風喻者矣 從去聲樂音洛璣于願切

弁人有其母死而孺子泣者孔子曰哀則哀矣而難為

繼也夫禮為可傳也為可繼也故哭踊有節

弁地名孺子泣者其

聲若孺子無長短高下之節也聖人制禮期於使人可傳可繼故哭踊皆有其節若無節則不可傳而繼矣

叔孫武叔之母死既小斂舉者出

句

尸出戶

句袒

句且

投其冠括髮子游曰知禮

禮始死將斬衰者筭纁將齊衰者素冠小斂畢而徹帷主

人括髮袒于房婦人髻于室舉者出舉尸以出也括髮當在小斂之後尸出堂之前主人為將奉尸故袒而括

髮耳今武叔待尸出戶然後袒而去冠括髮失禮節矣故註以子游知禮之言為強之也馮氏曰經文作尸

出戶上尸字乃尸字之訛也鄭註云尸出戶乃變服義甚明然註文尸亦訛為戶遂解不通為將為去聲奉

去並上聲扶君卜人師扶右射人師扶左君薨以是舉君疾時僕

人之長扶其右體射人之長扶其左體此二人皆平日贊正服位之人故君既薨遇遷尸則仍用此人也方氏

釋師為衆應氏以卜人為卜筮之人卜讀為僕從母之夫舅之妻二夫人相

為服君子未之言也或曰同爨總從母母之姊妹舅母之兄弟從母夫於舅

妻無服所以禮經不載故曰君子未之言時偶有甥至外家見此二人相依同居者有喪而無文可據於是或

人為同爨總之說以處之此亦原其情之不可已而極禮之變焉耳或問從母之夫舅之妻皆無服何也朱

子曰先王制禮父族四故由父而上為族曾祖父總麻姑之子姊妹之子女子子之子皆由父而推之也母族三母之父母之母母之兄弟恩止於舅故從母之夫舅之妻皆不為服推不去故也妻族二妻之父妻之母乍看似乎雜亂無紀子細看則皆有義存焉從去聲上夫如字下夫音扶為去聲處上聲為服為去聲喪

事欲其縱縱爾吉事欲其折折爾故喪事雖遽不陵節

吉事雖止不怠故騷騷爾則野鼎鼎爾則小人君子蓋

猶猶爾

縱縱給於趨事之貌折折從容中禮之貌喪事雖急遽而不可陵躐其節次吉事雖有立而待

事之時而不可失於怠惰若騷騷而太疾則鄙野矣鼎鼎而太舒則小人之為矣猶猶而得緩急之中君子行

禮之道也縱音總折音提遽其據切從平聲中去聲

喪具君子恥具一日二日

而可為也者君子弗為也

喪具棺衣之屬君子恥於早為之而畢具者嫌不以久生

期其親也然六十歲制七十時制八十月制九十日脩蓋慮夫倉卒之變也一日二日可辦之物則君子不豫為之所謂絞衿衾冒死而后制卒音猝絞音交衿音琴

喪服兄弟之子猶子也

蓋引而進之也嫂叔之無服也蓋推而遠之也姑姊妹

之薄也蓋有受我而厚之者也

方氏曰兄弟之子雖異出也然在恩為可親故

引而進之與子同服嫂叔之分雖同居也然在義為可嫌故推而遠之不相為服姑姊妹在室與兄弟姪皆不杖期出適則皆降服大功而從輕者蓋有受我者服為之重故也言其夫受之而服為之杖期以厚之故於本宗相為皆降一等也推他回切遠

食於有喪者之側

未嘗飽也

應氏曰食字上疑脫孔子字

曾子與客立於門側其徒趨

而出曾子曰爾將何之曰吾父死將出哭於巷曰反哭

於爾次曾子北面而弔焉

其徒門弟子也次其所寓之館舍也士喪禮主人西面

賓在門東北面北面此曾子所以北面而弔之也

孔子曰之死而致死之不仁而

不可為也之死而致生之不知而不可為也是故竹不

成用瓦不成味木不成斲琴瑟張而不平筭笙備而不

和有鐘磬而無簋虛其曰明器神明之也

劉氏曰之往也之死謂以

禮往送於死者也往於死者而極以死者之禮待之是無愛親之心為不仁故不可行也往於死者而極以生

者之禮待之是無燭理之明為不知故亦不可行也此所以先王為明器以送死者竹器則無縢緣而不成其用瓦器則麤質而不成其黑光之沫木器則樸而不成其雕斲之文琴瑟則雖張絃而不平不可彈也箏笙雖備具而不和不可吹也雖有鐘磬而無懸挂之簣虞不可擊也凡此皆不致死亦不致生而以有知無知之間待死者故備物而不可用也備物則不致死不可用則亦不致生其謂之明器者蓋以神明之道待之也知

去聲味音沫簣音筍虞音巨緣去聲

有子問於曾子曰問喪於夫子乎曰

聞之矣喪欲速貧死欲速朽有子曰是非君子之言也
曾子曰參也聞諸夫子也有子又曰是非君子之言也
曾子曰參也與子游聞之有子曰然然則夫子有為言

之也曾子以斯言告於子游子游曰甚哉有子之言似夫子也昔者夫子居於宋見桓司馬自為石椁三年而不成夫子曰若是其靡也死不如速朽之愈也死之欲速朽為桓司馬言之也

仕而失位曰喪桓司馬即桓魋靡侈也問音聞喪為並去聲

南宮敬叔反必載寶而朝夫子曰若是其貨也喪不如速貧之愈也喪之欲速貧為敬叔言之也

敬叔魯大夫孟僖子之子

仲孫閱也嘗失位去魯後得反載寶而朝欲行賂以求復位也

曾子以子游之言告於

有子有子曰然吾固曰非夫子之言也曾子曰子何以

知之有子曰夫子制於中都四寸之棺五寸之槨以斯

知不欲速朽也昔者夫子失魯司寇將之荊蓋先之以

子夏又申之以冉有以斯知不欲速貧也

定公九年孔子為中都宰

制棺槨之法制也四寸五寸厚薄之度將適楚而先使二子繼往者蓋欲觀楚之可仕與否而謀其可處之位

歟陳莊子死赴於魯魯人欲勿哭繆公召縣子而問焉

縣子曰古之大夫束脩之問不出竟雖欲哭之安得而

哭之

大夫計於他國之君曰君之外臣寡大夫某死莊子齊大夫名伯齊強魯弱不容略其赴縣子名知

禮故名問之脩脯也十脰為束問遺也為人臣者無外交不敢貳君也故雖束脩微禮亦不出竟

縣音玄

竟音境
遺去聲

今之大夫交政於中國雖欲勿哭焉得而弗哭

且臣聞之哭有二道有愛而哭之有畏而哭之公曰然

然則如之何而可縣子曰請哭諸異姓之廟於是與哭

諸縣氏

交政於中國言當時君弱臣強大夫專盟會之事以與國君相交也此變禮之由也愛之哭

出於不能已畏之哭出於不得已哭伯高於賜氏義之所在也哭莊子於縣氏勢之所迫也

仲憲言

於曾子曰夏后氏用明器示民無知也殷人用祭器示

民有知也周人兼用之示民疑也曾子曰其不然乎其

不然乎夫明器鬼器也祭器人器也夫古之人胡為而

死其親乎

仲憲孔子弟子原憲也示民無知者使民知死者之無知也為其無知故以不堪用之器

送之為其有知故以祭器之可用者送之疑者不以為有知亦不以為無知也然周禮惟大夫以上得兼用二器士惟用鬼器也曾子以其言非乃曰其不然乎再言之者甚不然之也蓋明器祭器固是人鬼之不同夏殷所用不同者各是時王之制文質之變耳非謂有知無知也若如憲言則夏后氏何為而忍以無知待其親乎

石梁王氏曰三代送葬之具質文相異故所用不同其意不在於無知有知及示民疑也仲憲之言皆非曾子非之未獨譏其說夏后明器蓋舉其失之甚者也為其為去聲

公叔木有同母異父

之昆弟死問於子游子游曰其大功乎狄儀有同母異

父之昆弟死問於子夏子夏曰我未之前聞也魯人則

為之齊衰狄儀行齊衰今之齊衰狄儀之問也

公叔木衛公叔

文子之子同父母之兄弟期則此同母而異父者當降而為大功也禮經無文故子游以疑辭答之魯人齊衰三月之服行之久矣故子夏舉以答狄儀而記者云因狄儀此問而今皆行之也此記二子言禮之不同鄭

氏曰大功是木式樹切

子思之母死於衛柳若謂子思曰子聖人

之後也四方於子乎觀禮子蓋慎諸子思曰吾何慎哉

吾聞之有其禮無其財君子弗行也有其禮有其財無

其時君子弗行也吾何慎哉

柳若衛人伯魚卒其妻嫁於衛有其禮謂禮所得為

者然無財則不可為禮時為大有禮有財而時不可為則亦不得為之也

蓋音盍縣子瑣曰吾

聞之古者不降上下各以其親滕伯文為孟虎齊衰其

叔父也為孟皮齊衰其叔父也

縣子名瑣疏曰古者殷時也周禮以貴降賤

以適降庶惟不降正耳而殷世以上雖貴不降賤也上下各以其親不降之事也上謂旁親族曾祖從祖及伯叔之班下謂從子從孫之流彼雖賤不以己尊降之猶各隨本屬之親輕重而服之故云上下各以其親滕國之伯名文為孟虎著齊衰之服者虎是文之叔父也又為孟皮著齊衰之服者文是皮之叔父也言滕伯上為叔父下為兄弟之子皆著齊衰也為去聲從去聲后木曰喪吾聞諸縣子曰夫

喪不可不深長思也買棺外內易我死則亦然

后木魯孝公子

惠伯輦之後馮氏曰此條重在不可不深長思一句買棺之時外內皆要精好此是孝子當為之事非是父

母豫所屬託而曰我死則亦然記
禮者譏失言也 易音異屬音燭曾子曰尸未設飾故

帷堂小斂而徹帷仲梁子曰夫婦方亂故帷堂小斂而

徹帷

始死去死衣用斂衾覆之以俟浴既復之後槨齒綴足畢具脯醢之奠事雖小定然尸猶未襲斂也

故曰未設飾於是設帷於堂者不欲人褻之也故小斂畢乃徹帷仲梁子謂夫婦方亂者以哭位未定也二子

各言禮意鄭云斂者動搖尸帷堂為人褻之言方亂非也仲梁子魯人去上聲覆去聲楔音屑為去聲小

斂之奠子游曰於東方曾子曰於西方斂斯席矣小斂

之奠在西方魯禮之末失也

疏曰儀禮小斂之奠設於東方奠又無席魯之衰末

奠於西方而又有席曾子見時如此將以為禮故云小斂於西方斯此也其斂之時於此席上而設奠矣故記

者正之云小斂之奠所以西方是魯人行禮末世失其義也今按儀禮布席于戶內註云有司布斂席也

在小斂之前及陳大斂衣奠則云奠席在饌北斂席在其東註云大斂奠而有席彌神之也據此則小斂奠無

席縣子曰綌衰總裳非古也

方氏曰葛之麤而卻者謂之綌布之細而疎者謂之

總五服一以麻各有升數若以綌為衰以總為裳則取其輕涼而已非古制也

綌去逆切總音歲子蒲

卒哭者呼減子臯曰若是野哉哭者改之

減子蒲之名也復則呼名

哭豈可呼名也野哉言其鄙野而不達於禮也子臯孔子弟子高柴

杜橋之母之喪宮中

無相以為沽也

疏曰沽麤略也孝子喪親悲迷不復自知禮節事儀皆須人相導而杜橋家母

死宮中不立相侍故時人謂其於禮為麤略也相去聲沽音古喪親喪去聲復去聲

夫子曰始

死羔裘玄冠者易之而已羔裘玄冠夫子不以弔

疏曰養疾

者朝服羔裘玄冠即朝服也始死則去朝服著深衣時有不易者又有小斂後羔裘弔者記者因引孔子行禮之事言之

朝音

潮去上聲著音勺

子游問喪具夫子曰稱家之有亡子

游曰有無惡乎齊夫子曰有母過禮苟亡矣斂首足形

還葬縣棺而封人豈有非之者哉

喪具送終之儀物也惡乎齊言何以爲厚

薄之劑量也母過禮不可以富而踰禮厚葬也還葬謂斂畢即葬不殯而待月日之期也縣棺而封謂以手縣繩而下之不設碑緯也人不非之者以無財則不可備禮也

稱去聲亡如字下同惡音烏齊去聲還音旋縣

音玄封音寔

司士賁告於子游曰請襲於牀子游曰諾縣子

聞之曰汰哉叔氏專以禮許人

賁司士之名也禮始死廢牀而置尸於地及復

而不生則尸復登牀襲者斂之以衣也沐浴之後商祝襲祭服祿衣蓋布於牀上也飯含之後遷尸於襲上而衣之襲於牀者禮也後世禮失而襲於地則襲矣司士知禮而請於子游子游不稱禮而答之以諾所以起縣子之譏也汰矜大也言凡有諮問禮事者當據禮答之子游子游專輒許諾則如禮自己出矣是自矜大也叔氏子游字賁音奔縣音玄尸復復扶又切祿音象衣之衣去聲

宋襄公葬其夫人醯醢

百甕曾子曰既曰明器矣而又實之

夏禮專用明器而實其半虛其半殷

人金用祭器亦實其半周人兼用二器則實人器而虛鬼器

孟獻子之喪司徒旅歸

四布夫子曰可也

疏曰送終既畢賻布有餘其家臣司徒承主人之意使旅下士歸還四方

賻主人之泉布時人皆貪而獻子家獨能如此故夫子曰可也善其能廉左傳叔孫氏之司馬駿戾是家臣亦有司徒司馬讀贈曾子曰非古也是再告也

車馬曰贈贈所以助

主人之送葬也既受則書其人名與其物於方版葬時柩將行主人之史請讀此方版所書之贈蓋於柩東當前東西面而讀之古者奠之而不讀周則既奠而又讀焉故曾子以為再告也

成子高寢疾慶

遺入請曰子之病革矣如至乎大病則如之何

成子高齊大夫

國伯高父謚成也遺慶封之族革與亟同急也

子高曰

大病死也諱之之辭

遺去聲革音亟入聲

吾聞之也生有益於人死不害於人吾縱生無益於人

吾可以死害於人乎哉我死則擇不食之地而葬我焉

不食之地謂不耕墾之土

子夏問諸夫子曰居君之母與妻之喪居

處言語飲食衎爾

君母君妻雖皆小君皆服齊衰不杖期然恩義則淺矣故居其喪則自處

如此衎爾和適之貌此章以文勢推之喪下當有如之何夫子曰字舊說謂記者之略亦或闕文歟又否則問

當作聞聲衎苦旦切

處上賓客至無所館夫子曰生於我乎館死

於我乎殯

生既館之死則當殯應氏曰朋友以義合謂之賓客者以其自遠方而來也國子

高曰葬也者藏也藏也者欲人之弗得見也是故衣足

以飾身棺周於衣槨周於棺土周於槨反壤樹之哉

國子

高即成子高也

疏曰子高之意人死可惡故備飾以衣衾棺槨欲其深邃不使人知今乃反更封壤為墳而

種樹以標之哉國子
意在於儉非周禮

孔子之喪有自燕來觀者舍於子

夏氏子夏曰聖人之葬人與人之葬聖人也子何觀焉

延陵季子之葬其子夫子尚往觀之今孔子之葬燕人
來觀亦其宜也然子夏之意以為聖人葬人則事皆合
禮人之葬聖人則未必皆合於禮也故語之曰子以為
聖人之葬人乎乃人之葬聖人也又何觀焉蓋謙辭也
燕與並平

聲語去聲

昔者夫子言之曰吾見封之若堂者矣見

若坊者矣見若覆夏屋者矣見若斧者矣從若斧者焉

馬鬣封之謂也今一日而三斬板而已封尚行夫子之

志乎哉

此言封土有此四者之形封築土為墳也若堂
者如堂之基四方而高也坊堤也若坊者上平

旁殺而南北長也若覆夏屋者旁廣而卑也若斧者上
狹如刃較之上三者皆用功力多而難成此則儉而易
就故俗謂之馬鬣封馬鬣鬣之上其肉薄封形似之也
今一日者謂今封築孔子之墳不假多時一日之間三
次斬板即封畢而已止矣其法側板於坎之兩旁而用
繩以約板乃內土於內而築之土與板平則斬斷約板
之繩而升此板於所築土之上又實土於其中而築之
如此者三而墳成矣故云三斬板而已封也尚庶幾也
乎哉疑辭亦謙不敢實言也坊
音防覆方救切去聲內土內音納
麻結本卒哭丈夫去麻帶服葛帶而首經不變婦人以
葛為首經以易去首之麻經而麻帶不變所謂不葛帶
也既練則男子除經婦人除帶婦人輕首重要故也然
此謂婦人居齊斬之服者如此若大功以下輕者至卒
哭則並變為有薦新如朔奠
葛與男子同
之朔奠者月朔之奠也未葬
之時大夫以上朔望皆有

奠士則朔而已如得時新之味或五穀新熟而薦之則其禮亦如朔奠之儀也既葬各以其服

除三月而葬葬而虞虞而卒哭親重而當變麻衰者池變之其當除者即自除之不俟主人卒哭之變也

視重霤疏曰池者柳車之池也重霤者屋之承霤也以木為之承於屋簷水霤入此木中又從木中而

霤於地故云重霤也天子之屋四注四面皆有重霤諸侯四注而重霤去後大夫惟前後二士惟一在前生時

屋有重霤故死時柳車亦象宮室而設池於車覆鼈甲之下牆帷之上蓋織竹為之形如籠衣以青布以承鼈

甲名之曰池以象重霤也方面君即位而為柩歲一漆之數各視生時重霤重平聲君即位而為柩歲一漆

之藏焉疏曰君諸侯也人君無論少長體尊物備即位即造為親尸之棺蓋地棺也漆之堅強甃甃然

故名柩每年一漆示如未成也藏焉者其中不欲空虛如急有待故藏物於中一說不欲令人見故藏之柩

音僻論少並去聲復楔齒綴足飯設飾帷堂並作招魂

長上聲地音移

之後用角枳柱尸之齒令開得飯舍時不閉又用燕几

拘綴尸之兩足令直使著屨時不辟戾也飯者實米與

貝于尸口中也設飾尸襲斂也帷堂堂上設帷也作起

為也復至帷堂六事一時並起故云並作也儀禮亦總

見一圖楔父兄命赴者疏曰生時與他人有恩識者

音屑綴音拙

告士喪禮孝子自命赴者若

大夫以上則父兄命之也君復於小寢大寢小祖大

祖庫門四郊即天子之郭門曰臯門明堂位言魯之庫門

王侯也前曰廟後曰寢室有東西廂曰廟無東西廂有

室曰寢小寢者高祖以下寢也王侯同大寢天子始祖

之寢諸侯太祖之寢也小祖者高祖以下廟也王侯同

大祖者天子始祖之廟諸侯太祖之廟也馬氏曰寢

所居處之地祖所有事之地門所出入之地郊所嘗至之地君復必於此者蓋魂氣之往亦未離生時熟習之地也觀此則死生之說可知矣今按馬氏以小寢大寢為燕寢正寢與舊說異喪不剝奠也

與祭肉也與

剝者不巾覆也脯醢之奠不惡塵埃故既可無巾覆凡覆之者必其有祭肉者也既

殯旬而布材與明器

材為槨之木也布者分列而暴乾之也殯後旬日即治此事禮獻材

于殯門外註云明器之材此云材與明器者蓋二者之材皆乾之也暴入聲乾音干

朝奠日出

夕奠逮日

逮日及日之未落也方氏曰朝奠以象朝時之食夕奠以象夕時之食孝子事死如事

生父母之喪哭無時使必知其反也

未殯哭不絕聲殯後雖有朝夕哭之

時然廬中思憶則哭小祥後哀至則哭此皆哭無時也使者受君之任使也小祥之後君有事使之不得不行

然反必祭告俾親之神靈知其已反亦練練衣黃裏縗
出必告反必面之義也必告告音谷

緣疏曰練小祥也小祥而著練冠練中衣故曰練也練
衣者以練為中衣黃裏者黃為中衣裏也正服不可

變中衣非正服但承衰而已縗淺絳色緣謂中衣
領及衰之緣也縗七眷切緣去聲著音勻衰袖同葛要

經繩屨無紃小祥男子去首之麻經惟餘要葛也故曰
葛要經繩屨者父母初喪管屨卒哭受齊

衰蒯蕪屨小祥受大功繩麻屨也無紃謂無屨頭飾也
朱子曰管屨疏屨今不可考今略以輕重推之斬衰

用今草鞋齊衰用麻鞋可也麻
鞋今卒伍所著者要平聲角瑱瑱充耳也吉時君

以掩於耳君用玉為之初喪去飾故無瑱
小祥後微飾故用角為之也瑱吐練切鹿裘衡長祛

祛裼之可也疏曰冬時吉凶衣裏皆有裘吉則貴賤有
異喪則同用鹿皮為之小祥之前裘狹而

短袂又無祛小祥稍飾則更易作橫廣大者又長之又設其祛也裼者裘上之衣吉時皆有喪後凶質未有裼衣小祥後漸向吉故加裼可也按如此文明小祥時外有衰衰內有練中衣中衣內有裼衣裼衣內有鹿裘鹿裘內自有常著襦衣今按祛者袖口也此所謂祛則是以他物為袖口之緣既祛以為飾故裼之可也衡

音橫章有殯聞遠兄弟之喪雖總必往非兄弟雖鄰不

往三年之喪在殯不得出弔然於兄弟則恩義存焉故雖總服兄弟之異居而遠者亦當往哭其喪若非兄

弟則雖近不往所識其兄弟不同居者皆弔馮氏曰上二句既主生者出弔往哭

為義則下一句文意當同所識當為句若所知之謂也死者既吾之所知識則其兄弟雖與死者不同居我皆

當弔之所以成天子之棺四重水兕革棺被之其厚三往來之情義也

寸杻棺一梓棺二四者皆周

水牛兕牛之革耐濕故以為親身之棺二革合被為

一重杻木亦耐濕故次於革即前章所謂柩也梓木棺二一為屬一為大棺杻棺之外有屬棺屬棺之外又有大棺四者皆周言四重之棺上下四方悉周币也惟槨不周下有茵上有抗席故也

棺束縮二衡三衽每束一

古者棺不用釘惟以皮條直束之二道橫束之三道衽形

如今之銀則子兩端大而中小漢時呼為小要不言何物為之其亦木乎衣之縫合處曰衽以小要連合棺與蓋之際故亦名衽先鑿木置衽然後束以皮每束處必用一衽故云衽每束一也

柏槨以端長

六尺

天子以柏木為槨端猶頭也用柏木之頭為之其長六尺

長去聲天子之哭諸侯

也爵弁經紼衣

諸侯薨而赴於天子天子哭之爵弁紼衣本土之祭服爵弁弁之色如爵也紼

衣絲衣也

鄭氏曰經衍字也周禮王弔諸侯弁經總

衰疏曰天子至尊不見尸柩不弔服此遠哭之故不

服總衰而服爵弁

紂衣也紂音縉或曰使有司哭之

鄭氏曰非也哀為之

不以樂食

疏曰此是記者之言非或人之說也為去聲

天子之殯也敢塗龍

輶以槨加斧於槨上畢塗屋天子之禮也

疏曰敢塗謂用水

叢棺而四面塗之也龍輶殯時用輶車載柩而畫轅為龍也以槨者此叢木象槨之形也繡覆棺之衣為斧文

先敢四面為槨使上與棺齊而上猶開以此棺衣從槨上入覆於棺故云加斧於槨上也畢畫也斧覆既竟又

四注為屋以覆於上而下四面盡塗之也

今按敢塗

龍輶是輶車亦在殯中非脫去輶車而殯棺也敢才

官切輶音春唯天子之喪有別姓而哭

諸侯朝覲天子爵同則其位同

覆並去聲

今喪禮則分別同姓異姓庶姓使各相從而為位以哭也 別必列切 魯哀公誄孔丘曰

天不遺耆老莫相予位焉嗚呼哀哉尼父 其生之實行

謂之誄大聖之行豈容盡列但言天不畱此老成而無有佐我之位者以寓其傷悼之意而已耳稱孔丘者君臣之辭此與左傳之言不同 鄭氏曰尼父因其字以為之謚也 相去聲父音甫行去聲 國亡大

縣邑公卿大夫士皆厭冠哭於大廟三日 句 君不舉或

曰君舉而哭於后土 厭冠喪冠也說見曲禮盛饌而以樂侑食曰舉后土社也 應氏曰

哭於大廟者傷祖宗基業之虧損哭於后土者傷土地封疆之脫削也不舉自貶損也曰君舉者非也 厭于

葉切大 孔子惡野哭者 所知吾哭諸野夫子嘗言之矣 蓋哭其所知必設位而帷之以

成禮此所惡者或郊野之際道路之間哭非其地又且倉卒行之使人疑駭故惡之也方氏說哭者呼減子臯曰野哉孔子惡者以此恐未然惡去聲卒音猝未仕者不敢稅人如稅人則

以父兄之命

稅人以物遺人也未仕者身未尊顯故內則不可專家財外則不可私恩惠也或有

情義之所不得已而當遺者則士備入而后朝夕踊

國君

稱尊者之命而行之遺去聲之喪諸臣有朝夕哭踊之禮哭雖依次居位踊必相視為節不容有先後也士卑其入恒後士皆入則無不在者矣故舉士入祥而縞是月禫徙月樂

疏曰祥大祥也縞謂縞冠大祥

為畢而後踊焉日著之馬氏曰祥禫之制施於三年之喪則其月同施於期之喪則其月異雜記曰十一月而練十三月而祥十五月而禫此期之喪也父在為母有所屈三年所以為極而至於二十五月者其禮不可過以三年之愛

而斷於期者其情猶可伸在禘月而樂者聽於人也
在饗月而樂者作於已也為母為去聲斷音短
於士有賜帝
帝幕之小者置之殯上以承塵也大夫以上則有司供之士卑又不得自為故君於
士之殯以帝賜之也
帝音亦

檀弓下第四

君之適長殯車三乘公之庶長殯車一乘大夫之適長

殯車一乘

此言送殯遣車之禮君謂國君亦或有地大夫通得稱君也公專言五等諸侯也十六至

十九為長殯葬此殯時柩朝廟畢將行設遣奠以奠之牲體分折包裹用此車載之以遣送死者故名遣車車制甚小以置之椁內四隅不容大為之也禮中殯從上君適長三乘則中亦三乘下則一乘也公庶長一乘則

中亦一乘下則無也大夫適長一乘則中亦一乘下
殤及庶殤並無也適音的長上聲乘遺並去聲公

之喪諸達官之長杖

方氏曰受命於君者其名達於上故謂之達官若府史而下皆長官

自辟除則不可謂之達矣受命於君者其恩厚故公之喪惟達官之長杖今按凡官皆有長貳此以長言則

不及貳也君於大夫將葬弔於宮及出命引之三步則

止如是者三君退

句

朝亦如之哀次亦如之

弔於宮於其殯宮也

出柩已行也孝子攀號不忍君命引之奪其情也引者

三步即止君又命引之如是者三柩車遂行君即退去

君來時不必恒在殯宮或當柩朝廟之時亦如之或已

出大門至平日待賓客次舍之處孝子哀而暫停柩車

則亦如之

季武

如之五十無車者不越疆而弔人始衰之年不可以筋力為禮也

子寢疾蟠固不說齊衰而入見曰斯道也將亡矣士唯

公門說齊衰武子曰不亦善乎君子表微及其喪也曾

點倚其門而歌

季武子魯大夫季孫夙也蟠固人姓名點字皙曾子父也武子寢疾之時蟠固

適有齊衰之服遂衣凶服而問疾且曰大夫之門不當釋凶服惟君門乃說耳此禮將亡我之凶服以來欲以救此將亡之禮也武子善之言失禮之顯著者人皆可知若失禮之微細者惟君子乃能表明之也武子執政人所尊畏固之為此欲以易時人之觀瞻據禮而行武子雖憾不得而罪之也若倚門而歌則非禮矣其亦狂之一端歟記者蓋善蟠固之存禮譏曾點之廢禮也

蟠音矯說音脫遂衣衣去聲

大夫弔當事

而至則辭焉弔於人是日不樂婦人不越疆而弔人行

弔之日不飲酒食肉焉

大夫弔弔於士也大夫雖尊然當主人有小斂大斂或殯之事

而至則殯者以其事告之辭猶告也若非當事之時則孝子下堂迎之婦人無外事故不越疆而弔是日不樂不飲酒食肉皆為餘哀未忘也為去聲弔於葬者必執引若從柩及壙皆

執紼

引引柩車之索也紼引棺索也鄭氏曰示助之疏曰弔葬本為助執事故必相助引柩車

凡執引用人貴賤有數數足則餘人皆散行從柩至下棺定時則不限人數皆悉執紼也引者長遠之名故在車車行遠也紼是撥舉之義故在棺棺惟撥舉不長遠也引去聲壙上聲為相並去聲喪公弔之

必有拜者雖朋友州里舍人可也弔曰寡君承事主人

曰臨

此謂國君弔其諸臣之喪弔後主人當親往拜謝喪家若無主後必使以次疏親往拜若又無疏親

則死者之朋友及同州同里及喪家典舍之人往拜亦可也寡君承事言來承助喪事此君語擯者傳命以入之辭主人曰臨者謝辱臨之重也臨如字君遇柩於路必使人弔之黃尚畫宮

受弔不如杞梁之妻知禮而此言弔於路何也蓋有爵者之喪當以禮弔此謂臣民之微賤者耳禮不下庶人

也言必使人弔者是也言衆人之喪也大夫之喪庶子不受弔大夫之喪適子為主

拜賓或以他故不在則庶子不敢受弔不敢以卑賤為有爵者之喪主也妻之昆弟為父後

者死哭之適室子為主袒免哭踊夫入門右使人立於

門外告來者狎則入哭父在哭於妻之室非為父後者

哭諸異室此聞妻兄弟之喪而未往弔時禮也父在己之父也為父後妻之父也門外之人以來弔

者告若是交游習狎之人則徑入哭之情義然也疏
曰女子子適人者為昆弟之為父後者不降以其正故
也故姊妹之夫為之哭於適室之中庭子為主者甥服
舅總故命已子為主受吊拜賓也袒免哭踊者冠尊不
居肉袒之上必先去冠而加免故凡哭哀則踊踊必先
袒袒必先免故袒免哭踊也夫入門右者謂此子之父
即哭妻兄弟者適音的免音有殯聞遠兄弟之喪哭
問夫如字為昆弟之為去聲

于側室無側室哭于門內之右同國則往哭之側室者燕寢之

旁室也門內大門之內也上篇言有殯聞遠兄弟之喪雖
總必往其亦謂同國歟方氏曰哭于側室欲其速殯
宮也于門內之右者不居主位示為之變也同國
則往者以其不遠也遠殯遠為之為並去聲子張

死曾子有母之喪齊衰而往哭之或曰齊衰不以弔曾

子曰我弔也與哉

以喪母之服而哭朋友之喪踰禮已甚故或人止之而曾子之意則曰我

於子張之死豈常禮之弔而已哉今詳此意但以友義隆厚不容不往哭之又不可釋服而往但往哭而不行

弔禮耳故曰我弔也與哉

劉氏曰曾子嘗問三年之

喪弔乎夫子曰三年之喪練不羣立不旅行君子禮以

飾情三年之喪而弔哭不亦虛乎既聞此矣而又以母

喪弔友必不然也凡經中言曾子失禮之事不可盡信

此亦可見

與平聲

有若之喪悼公弔焉子游攬由左

悼公魯君哀公之子

攬贊相禮事也立者尊者子游由公之左則公在右為

尊矣少儀云詔辭自右者謂傳君之詔命則詔命為尊

故傳者居右時相喪禮者

亦多由右故子游正之也齊穀王姬之喪魯莊公為之

大功或曰由魯嫁故為之服姊妹之服或曰外祖母也

故為之服穀讀為告齊襄公夫人王姬卒在魯莊之二

出嫁姊妹大功之服禮也或人既不知此王姬乃莊公

舅之妻而以為外祖母又不知外祖母服小功而以大

功為外祖母之服其亦妄矣鄭氏曰春秋周女由魯

嫁卒則服之如內女服姊妹是也天子為之無服嫁於

王者之後乃服之穀音告為去聲晉獻公之喪秦穆公使人弔公子重

耳且曰寡人聞之亡國恒於斯得國恒於斯雖吾子儼

然在憂服之中喪亦不可久也時亦不可失也孺子其

圖之獻公薨時重耳避難在狄故穆公使人往弔之弔

為正禮故以且曰起下辭寡人聞之者此使者傳

穆公之言也恒於斯言常在此死生交代之際也儼然

端靜持守之貌喪失位也喪不可久時不可失者勉其

奔喪反國以謀襲位故言孺子其圖之也此時秦已有納之之志矣

重平聲喪去聲下並同難去聲使者使

去聲以告舅犯舅犯曰孺子其辭焉喪人無寶仁親以為

寶父死之謂何又因以為利而天下其孰能說之孺子

其辭焉

舅犯重耳舅狐偃字子犯也公子既聞使者之言入以告之子犯犯言當辭而不受可也失位

去國之人無以為寶惟在愛思親乃其寶也父死謂是何事正是凶禍大事豈可又因此凶禍以為反國之利而天下之人孰能解說我為無罪乎此所以不當受其相勉反國之命也

說如字公子重耳對

客曰君惠弔亡臣重耳身喪父死不得與於哭泣之哀

以為君憂父死之謂何或敢有他志以辱君義稽顙而

不拜哭而起起而不私

公子既聞子犯之言乃出而答客惠弔亡臣重耳謝其來弔也

不得與哭泣之哀言出亡在外不得居喪次也以為君憂者致君憂慮我也他志謂求位之志辱君義者辱

君惠弔之義也不私不再與使者私言也與去聲子顯以致命於穆公穆公曰

仁夫公子重耳夫稽顙而不拜則未為後也故不成拜

哭而起則愛父也起而不私則遠利也

鄭註用國語知使者為公子繫

字子韞故讀顯謂韞也喪禮先稽顙後拜謂之成拜為後者成拜所以謝弔禮之重今公子以未為後故不成

拜也愛父猶言哀痛其父也不私與使者言是無反國之意是遠利也愛父遠利皆仁者之事故稱之曰仁夫

公子重耳顯

去聲遠去聲

惟殯非古也自敬姜之哭穆伯始也

禮朝

夕哭殯之時必褰開其帷敬姜哭其夫穆伯之殯乃以避嫌而不復褰帷自此以後人皆倣之故記者云非古也

穆伯魯大夫季悼子之子公甫靖也喪禮哀戚之至也節哀順變也君子

念始之者也孝子之哀發於天性之極至豈可止遏聖人制禮以節其哀蓋順以變之也言順孝

子之哀情以漸變而輕減也始猶生也生我者父母也毀而滅性是不念生我者矣復盡愛之道

也有禱祠之心焉望反諸幽求諸鬼神之道也北面求

諸幽之義也其行禱五祀而不能回其生又為之復是盡其愛親之道而禱祠之心猶未忘於復之

時也望反諸幽望其自幽而反也鬼神處幽暗北乃幽陰之方故求諸鬼神之幽者必向北也拜稽顙

哀戚之至隱也稽顙隱之甚也隱痛也稽顙者以頭觸地無復禮容就拜與稽

顙言之皆為至痛而稽顙則尤其痛之甚者也飯用米貝弗忍虛也不以食道

用美焉爾

實米與貝于死者口中不忍其口之虛也此不是用飲食之道但用此美潔之物以實之

焉銘明旌也以死者為不可別已故以其旗識之愛之

斯錄之矣敬之斯盡其道焉耳

士喪禮銘曰某氏某之柩初置于簷下西階上

及為重畢則置于重殯而卒塗始樹於殯坎之東疏云士長三尺大夫五尺諸侯七尺天子九尺若不命之士

則以緇長半幅經末長終幅廣三寸半幅一尺也終幅二尺也是總長三尺夫愛之而錄其名敬之而盡其道

曰愛曰敬非虛文也別必列切識式志切重平聲律羊志切經教貞切

重主道也殷主綴

重焉周主重徹焉

禮註云士重木長三尺始死作重以依神雖非主而有主之道故曰主道

也殷禮始殯時置重于殯廟之庭暨成虞主則緦此重而懸於新死者所殯之廟周人虞而作主則徹重而埋之也重平奠以素器以生者有哀素之心也唯祭祀

之禮主人自盡焉爾豈知神之所饗亦以主人有齊敬

之心也

鄭氏曰哀素言哀痛無飾也凡物無飾曰素哀則以素敬則以飾禮由人心而已方氏曰士

喪禮有素俎士虞禮有素几皆其哀而不文故也喪葬凶禮故若是至於祭祀之吉禮則必自盡以致其文焉故曰唯祭祀之禮主人自盡焉爾然主人之自盡亦豈知神之所享必在於此乎且以表其心而已耳齊音

齊辟踊哀之至也有算為之節文也

疏曰撫心為辟跳躍為踊是哀痛之

至極若不裁限恐傷其性故有算以為之準節每一踊三跳三踊九跳為一節士三日有三次踊大夫四日五

踊諸侯六日七踊天子八日九踊袒括髮變也愠哀之故云為之節文也辟婢亦切

變也去飾去美也袒括髮去飾之甚也也有所袒有所襲

哀之節也

疏曰袒衣括髮形貌之變也悲哀愠恚哀情之變也去其尋常吉時之服飾是去其華美

也去飾雖多端惟袒而括髮又去飾之中最甚者也理應常袒何以有袒時有襲時蓋哀甚則袒哀輕則襲哀之限節也

去上聲

弁經葛而葬與神交之道也有敬心焉周人

弁而葬殷人冔而葬

居喪時冠服皆純凶至葬而吾親託體地中則當以禮敬之心接於

山川之神也於是以絹素為弁如爵弁之制以葛為環經在首以送葬不敢以純凶之服交神者示敬也故曰有敬心焉

冔火羽切

歆主人主婦室老為其病也君命食之也

疏曰親喪歠粥之時主人亡者之子主婦亡者之妻無則主人之妻也室老家之長相此三人並是大夫之家貴者為其歠粥病困之故君必命之食疏飯也若士喪君不命也喪大記言主婦食疏食謂既殯之後此主婦歠者謂未殯前為去聲食音嗣

反哭升堂反諸其所作也主婦入于

室反諸其所養也

此堂與室皆謂廟中也卒窆而歸乃反哭於祖廟其二廟者則先祖後禰

所作者平生祭祀冠昏所行禮之處也所養者所饋食供養之處也養去聲冠去聲反哭之弔

也哀之至也反而亡焉失之矣於是為甚

實之弔者升自西階曰如

之何主人拜稽顙當此之時亡矣失矣不可復見吾親矣哀痛於是為甚也賓弔畢而出主人送于門外遂適殯官即先時所殯正寢之堂也殷既封而弔周反哭而弔孔子曰殷已

慤吾從周

殷之禮室畢賓就墓所弔主人周禮則俟主人反哭而後弔孔子謂殷禮太質慤者蓋親

之在土固為可哀不若求親於平生居止之所而不得其哀為尤甚也故弔於墓者不如弔於家者之情文為兼盡故欲從周

封音室

葬於北方北首三代之達禮也之幽之

故也

北方國之北也殯猶南首未忍以鬼神待其觀也葬則終死事矣故葬而北首三代通用此禮也南

方昭明北方幽暗之幽釋

既封主人贈而祝宿虞尸

行

所以北首之義首去聲
至城門公使宰夫贈玄纁束既定則用此玄纁贈死者於墓之野此時祝先歸而肅虞祭之尸矣宿讀為肅進也虞猶安也葬畢迎精而反日中祭之於殯宮以安之也男則男子為尸女則女子為尸尸之為言主也不見親之形容心無所係故立尸而使之著死者之服所以使孝子之心主於此也禫祭以前男女異尸異几祭於

廟則無女尸而几亦同矣少牢禮云某妃配是男女共尸著直略切少去聲既反哭主人與

有司視虞牲有司以几筵舍奠於墓左反日中而虞之

禮虞牲特豕几所以依神筵坐神之席也席敷陳曰筵孝子先反而視牲別令有司釋奠以禮地神為親之託體於此也舍讀為釋奠者置也釋置此祭饌也墓道向南以東為左待此有司之反即於日中時虞祭也舍音釋數敷同葬日虞弗忍一日離也鄭氏曰弗忍其無為親為去聲

是日也以虞易奠卒哭曰成事始死小斂大斂朝夕朔

奠也此日以虞祭代去喪奠故曰以虞易奠也卒哭曰成事者蓋祝辭曰哀薦成事也祭以吉為成卒哭之祭

乃吉祭是日也以吉祭易喪祭明日祔于祖父哭之祭

也喪祭虞祭也卒哭在虞之後故云以吉祭易喪祭也
祔之為言附也祔祭者告其祖父以當遷他廟而告新
死者以當入此廟也禮云明日以其班祔明日者卒哭
之次日也卒哭時告于新主曰哀子某來日祔祔屬于
爾皇祖某甫及時則奉新主入祖之廟而并告之曰適
爾皇祖某甫以祔祔爾孫某甫孫必祔祖者昭穆之位
同所謂以其班也畢事虞主復于寢三年喪畢遇四時
之吉祭而後奉新主入廟也虞祭間一日而卒哭與祔
則不間日并間並去聲其變而之吉祭也比至於祔必於是日也

接不忍一日未有所歸也

上文所言皆據正禮此言變者以其變易常禮也所以有

變者以有他故未及葬期而即葬也據士禮速葬速虞
之後卒哭之前其日尚賒不可無祭之往也虞往至吉
祭其禮如何曰虞後比至於祔遇剛日而連接其祭若
丁日葬則已日再虞後虞改用剛日則庚日三虞也比

後遇剛日則祭至祔而後止此孝子不忍使其親一日無所依歸也此音界殷練而祔周卒

哭而祔孔子善殷

孝經曰為之宗廟以鬼享之孔子善殷之祔者以不急於鬼其親也

君

臨臣喪以巫祝桃茢執戈惡之也所以異於生也喪有

死之道焉先王之所難言也

桃性辟惡鬼神畏之王莽惡高廟神靈以桃湯灑其

壁茢莒帚也所以除穢巫執桃祝執茢小臣執戈蓋為其有凶邪之氣可惡故以此三物辟祓之也臨生者則惟執戈而已今加以桃茢故曰異於生也君使臣以禮死而惡之豈禮也哉然人死斯惡之矣故喪禮實有惡死之道焉先王之所不忍言也

茢音列惡難並去聲辟音闢

喪之朝也順死者之孝

心也其哀離其室也故至於祖考之廟而后行殷朝而

殯於祖周朝而遂葬

子之事親出必告反必面今將葬而奉柩以朝祖固為順死者之孝

心然求之死者之心亦必自哀其違離寢處之居而永棄泉壤之下亦欲至祖考之廟而訣別也殷尚質敬鬼神而遠之故大斂之後即奉柩朝祖而遂殯於廟周人則殯於寢及葬則朝廟也孔子謂為明

器者知喪道矣備物而不可用也

此孔子善夏之用明器從葬從去聲

哀哉死者而用生者之器也不殆於用歿乎哉

此孔子非殷人

用祭器從葬以人從死曰殉殆幾也用其器則近於用人

其曰明器神明之也塗車

芻靈自古有之明器之道也孔子謂為芻靈者善謂為

俑者不仁不殆於用人乎哉

謂之明器者是以神明之道待之也塗車以泥為車

也束草為人形以為死者之從衛謂之芻靈略似人形而已亦明器之類也中古為木偶人謂之俑則有面目機發而太似人矣故孔子惡其不仁知末流必有以人殉葬者趙氏曰以木人送葬設機而能踊跳故名之

曰備 穆公問於子思曰為舊君反服古與子思曰古之君

子進人以禮退人以禮故有舊君反服之禮也今之君

子進人若將加諸膝退人若將隊諸淵毋為戎首不亦

善乎又何反服之禮之有

穆公魯君哀公之曾孫為舊君服見儀禮齊衰章孟子言

三有禮則為之服寇讎何服之有與此章意似隊諸淵言置之死地也戎首為寇亂之首也為舊為去聲與

平聲隊音墜

悼公之喪季昭子問於孟敬子曰為君何食敬

子曰食粥天下之達禮也

悼公魯哀公之子昭子康子之曾孫名強敬子武伯之子名捷

吾三臣者之不能居公室也四方莫不聞矣勉而為瘠

則吾能毋乃使人疑夫不以情居瘠者乎哉我則食食

三臣仲孫叔孫季孫之三家也敬子言我三家不能居公室而以臣禮事君者四方皆知之矣勉強食粥而為

毀瘠之貌我雖能之然豈不使人疑我非以衰戚之真情而處此瘠乎不若違禮而食食也

應氏曰季子之

問有君子補過之心而孟氏之對可謂小人之無忌憚者矣

食上如字下音嗣

衛司徒敬子

死子夏弔焉主人未小斂經而往子游弔焉主人既小

斂子游出經反哭子夏曰聞之也與曰聞諸夫子主人

未改服則不經

司徒以官為氏也主人未小斂則未改服故弔者不經子夏經而往弔非也其

時子游亦弔俟其小斂後改服乃出而加經反哭之則中於禮矣

與平聲中去聲

曾子曰晏子

可謂知禮也已恭敬之有焉有若曰晏子一狐裘三十

年遣車一乘及墓而反

晏子齊大夫曾子稱其知禮謂禮以恭敬為本也有若之言則

曰狐裘貴在輕新乃三十年而不易是儉於己也遣車一乘儉其親也禮寔後有拜賓送賓等禮晏子寔訖即還儉於賓也此三者皆以其儉而失禮者也

遣乘並去聲下節同

國君七个遣車七乘

大夫五个遣車五乘晏子焉知禮

遣車之數天子九乘諸侯七乘大夫五乘

天子之士三乘諸侯之士無遣車也大夫以上皆太牢士少牢个包也凡包牲皆取下體每一牲取三體前脰

折取臂臑後脰折取髀少牢二牲則六體分為三個太牢三牲則九體大夫九體分為十五段三段為一包凡五包諸侯分為二十一包凡七包天子分為二十七段凡九包每遣車一乘則載一包也 曾子曰國

無道君子恥盈禮焉國奢則示之以儉國儉則示之以

禮

曾子主權有子主經是以二端之論不合

國昭子之母死問於子張曰葬

及墓男子婦人安位子張曰司徒敬子之喪夫子相男

子西鄉婦人東鄉

國昭子齊大夫葬其母以子張相禮故問之夫子孔子也主人家男子皆

西鄉婦人皆東向而男賓在衆主人之南女賓在衆婦之南禮也相鄉並去聲

曰噫母曰我

喪也斯沾爾專之賓為賓焉主為主焉婦人從男子皆

西鄉

昭子開子張之言歎息而止之言我為大夫齊之顯家今行喪禮人必盡求覲視當有所更改以示

人豈宜一循舊禮爾當專主其事使賓自為賓主自為主可也於是昭子家婦人既與男子同居主位而西鄉而女賓亦與男賓同居賓位而東鄉矣斯盡也沾讀為覲此記禮之變 毋無同斯去聲沾覲同更平聲穆

伯之喪敬姜晝哭文伯之喪晝夜哭孔子曰知禮矣

哭

以禮哭子以情中節矣故孔子美之中去聲

文伯之喪敬姜據其牀而不哭

曰昔者吾有斯子也吾將以為賢人也吾未嘗以就公

室今及其死也朋友諸臣未有出涕者而內人皆行哭

失聲斯子也必多曠於禮矣夫

以為賢人必知禮矣故凡我平日出入公室未

嘗與俱而觀其所行蓋信其賢而知禮也至死而覺其曠禮故歎恨之

鄭氏曰李氏魯之宗卿敬姜有會見

之禮季康子之母死陳褻衣敬姜曰婦人不飾不敢見舅

姑將有四方之賓來褻衣何為陳於斯命徹之

敬姜康子之從

祖母也應氏曰敬姜森然法度之語見音現從去聲

有子與子游立見孺子慕

者有子謂子游曰予壹不知夫喪之踊也予欲去之久

矣情在於斯其是也夫

有子言喪禮之有踊我常不知其何為而然壹者專一之義猶

常也我久欲除去之矣今見孺子之號慕若此則哀情之在於此踊亦如此孺子之慕也夫

去上聲

子

游曰禮有微情者有以故興物者有直情而徑行者戎

狄之道也禮道則不然

子游言先王制禮使賢者俯而就之而不肖者企而及之慮賢者

之過於情也故立為哭踊之節所以殺其情故曰禮有微情者微猶殺也慮不肖者之不及情也故為之興起衰經之物使之睹服思哀故曰有以故興物者此二者皆制禮者酌人情而為之也若直肆已情徑率行之或哀或不哀漫無制節則是戎狄之道矣中國禮義之道則不如是也

人喜則斯陶陶斯咏

咏斯猶斯舞舞斯愔愔斯戚戚斯歎歎斯辟辟斯踊

矣品節斯斯之謂禮

此言樂極生哀之情但舞斯愔一句終是可疑今且據疏劉氏欲於

猶斯舞之下增一矣字而刪舞斯愔三字今亦未敢從疏曰喜者外境會心之謂斯語助也陶謂鬱陶心初悅而未暢之意鬱陶之情暢則口歌咏之也咏歌不足漸至動搖身體乃至起舞舞足蹈手揚樂之極也外境達

心之謂愠凡喜怒哀相對哀樂相生若舞無節形疲厭倦
事與心違所以怒生愠怒之生由於舞極故曲禮云樂
不可極也此凡九句首末各四句是哀樂相對中間舞
斯愠一句是哀樂相生愠斯戚者怒來觸心憤恚之餘
轉為憂戚憂戚轉深因發歎息歎恨不泄遂至撫心撫
心不泄乃至跳踊奮擊亦哀之極也故夷狄無禮朝殯
夕歌童兒任情候啼歔笑今若品節此二塗使踊舞有
數則能久長故云斯之謂禮品階格也節制斷也孫
氏曰當作人喜則斯陶陶斯咏咏斯猶猶斯舞舞斯蹈
矣人悲則斯愠愠斯戚戚斯歎歎斯辟辟斯踊矣蓋自
喜至蹈凡六變自悲至踊亦六變此所謂孺子慕者之
直情也舞蹈辟踊皆本此情聖人於是為之節猶音
搖辟婢亦人死斯惡之矣無能也斯倍之矣是故制絞
切樂音洛

衾設蓐翼為使人勿惡也

以其死而惡之以其無能而倍之恐太古無禮之時人多

如此於是推原聖人所以制禮之初意止為使人勿惡勿倍而已絞衾以飾其體萋翣以飾其棺則不見死者之可惡矣惡去聲絞音艾萋音柳為去聲始死脯醢之奠將行遣而行之

既葬而食之未有見其饗之者也自上世以來未之有

舍也為使人勿倍也故子之所刺於禮者亦非禮之訾

也始死即為脯醢之奠將葬則有包裹牲體之遣既葬則有虞祭之食何嘗見死者享之乎然自上世制禮

以來未聞有舍而不為者為此則報本反始之思自不能已矣豈復有倍之之意乎先王制禮其深意蓋如此今子刺喪之踊而欲去之者亦不足以為禮之疵病也遣去聲食去聲舍上聲為去聲刺音次訾音疵復扶

又切吳侵陳斬祀殺厲師還出竟陳大宰嚭使於師夫差

謂行人儀曰是夫也多言盍嘗問焉師必有名人之稱

斯師也者則謂之何

魯哀公元年吳師侵陳斬祀伐祠祀之木也殺厲殺疫病人也大

宰行人皆官名夫差吳子名是夫猶言此人指語也多言猶能言也盍何不也嘗試也師必有名者言出師伐

人必得彼國之罪以顯我出師之名也今衆人稱我此師謂之何名乎還音旋竟音境大音泰語普彼切使

去聲夫差音扶叙是夫夫如字

大宰嚭曰古之侵伐者不斬祀不殺厲

不獲二毛今斯師也殺厲與其不謂之殺厲之師與曰

反爾地歸爾子則謂之何曰君王討敝邑之罪又矜而

赦之師與有無名乎

二毛斑白之人也子謂所獲臣民也還其侵略之地縱其俘獲之民

是矜而赦之矣豈可又以無名之師議之乎此言善
於辭令故能救敗亡之禍 石梁王氏曰是時吳亦有

大宰詔如何 顏丁善居喪始死皇皇焉如有求而弗得
與並平聲

及殯望望焉如有從而弗及既葬慨焉如其反而

息

顏丁魯人皇皇猶栖栖也望望往而不顧之貌慨感
愜之意始死形可見也既殯柩可見也葬則無所見

矣如有從而弗及似有可及之處也葬後則不復如有所從矣故但言如不及其反又云而息者息猶待也不
忍決忘其親猶且行且止以待其親之反也蓋葬者往
而不反然孝子於迎精而反之時猶如有所疑也 復

去子張問曰書云高宗三年不言言乃謹有諸仲尼曰

胡為其不然也古者天子崩王世子聽於冢宰三年

言

謹者命令所布人心喜悅也

知悼子卒未葬平公飲酒師曠李調侍

鼓鐘杜蕢自外來聞鐘聲曰安在曰在寢杜蕢入寢歷

階而升酌曰曠飲斯又酌曰調飲斯又酌堂上北面坐

飲之降趨而出

知悼子晉大夫名縈平公晉侯彪也凡三酌者既罰二子又自罰也知去聲

蕢音快飲去聲

平公呼而進之曰蕢曩者爾心或開予是以不

與爾言爾飲曠何也曰子卯不樂知悼子在堂斯其為

子卯也大矣曠也太師也不以詔是以飲之也

言爾之初入我

意爾必有所諫教開發於我我是不先與爾言乃三酌之後竟不言而出爾之飲曠何說也蕢言桀以乙卯

日死紂以甲子日死謂之疾日故君不舉樂在堂在殯也況君於卿大夫比葬不食肉比卒哭不舉樂悼子在殯而可作樂燕飲乎桀紂異代之君悼子同體之臣故以為大於子卯也詔告也罰其不告之罪也爾飲

調何也曰調也君之褻臣也為一飲一食忘君之疾是

以飲之也

言調為近習之臣貪於一飲一食而忘君違禮之疾故罰之也

飲去聲爾飲何

也曰蕢也宰夫也非刀匕是共又敢與知防是以飲之

也非猶不也宰夫職在刀匕今乃不專供刀匕之職而敢與知諫爭防閑之事是侵官矣故自罰也共音

供與去聲爭音諍

平公曰寡人亦有過焉酌而飲寡人杜蕢洗

而揚觶公謂侍者曰如我死則必毋廢斯爵也至于今

既畢獻斯揚解謂之杜舉

揚解舉解也盥洗而後舉致潔敬也平公自知其過既命

黃以酌又欲以此爵為後世戒故記者云至今晉國行燕禮之終必舉此解謂之杜舉者言此解乃昔者杜黃所舉也春秋傳作屠蒯公叔文子卒其子戍請謚於君

文亦不同

解音志

曰日月有時將葬矣請所以易其名者

文子衛大夫名拔君靈公也大

夫士三月而葬有時猶言有數也死則諱其名故為之謚所以代其名也

戍音庶

君曰昔者衛

國凶饑夫子為粥與國之餓者是不亦惠乎昔者衛國

有難夫子以其死衛寡人不亦貞乎夫子聽衛國之政

脩其班制以與四鄰交衛國之社稷不辱不亦文乎故

謂夫子貞惠文子

魯昭公二十年盜殺衛侯之兄縶時齊豹作亂公如死鳥此衛國之難也

班者尊卑之次制者多寡之節因舊典而脩舉之也據先後則惠在前論小大則貞為重故不曰惠貞而曰貞惠也此三字為諡而惟稱文子者鄭云文足以兼之難去聲

石駘仲卒無適子有庶

子六人卜所以為後者曰沐浴佩玉則兆五人者皆沐

浴佩玉石祁子曰孰有執親之喪而沐浴佩玉者乎不

沐浴佩玉石祁子兆衛人以龜為有知也

駘仲衛大夫曰沐浴佩玉

則兆卜人之言也

方氏曰兆亦有凶卜者以求吉為主故經以兆言吉也

駘音苔適音的

陳子車死於衛其妻與其家大夫謀以殉葬定而后陳子亢至

以告曰夫子疾莫養於下請以殉葬

子車齊大夫子亢其兄弟即孔子弟

子子禽也疾時不在家家人不得以致其養故云莫養於下也於是欲殺人以殉葬定謂已議定所殺之人也

亢音剛養去聲

子亢曰以殉葬非禮也雖然則彼疾當養者

孰若妻與宰得已則吾欲已不得已則吾欲以二子者

之為之也於是弗果用

宰即家大夫也二子謂妻與宰也子亢若但言非禮未必能止

之今以當養者為當殉則不期其止而自止矣

子路曰傷哉貧也生無以為養

死無以為禮也孔子曰啜菽飲水盡其歡斯之謂孝斂

首足形還葬而無槨稱其財斯之謂禮

世固有三姓之養而不能斂者

亦有厚葬以為觀美而不知陷於僭禮之罪者知此則孝與禮可得而盡矣又何必傷其貧乎還葬說見上篇

養去聲還音旋稱去聲

衛獻公出奔反於衛及郊將班邑於從者

而后入柳莊曰如皆守社稷則孰執羈勒而從如皆從

則孰守社稷君反其國而有私也母乃不可乎弗果班

獻公以魯襄十四年奔齊二十六年歸衛羈所以絡

馬勒所以輕馬莊之意謂居者行者均之為國不當獨

賞從者以示私恩

從去聲勒音的

衛有大史曰柳莊寢疾公曰若疾革

雖當祭必告公再拜稽首請於尸曰有臣柳莊也者非

寡人之臣社稷之臣也聞之死請往不釋服而往遂以

祔之與之邑裘氏與縣潘氏書而納諸棺曰世世萬子

孫母變也

以衣服贈死者曰祔裘縣潘二邑名萬子孫謂莊之後世也莊之疾公嘗命其家若當疾

亟之時我雖在祭事亦必入告及其死也果當公行事之際遂不釋祭服而往因釋以祔之又賜之二邑此雖見國君尊賢之意然棄祭事而不終以諸侯之命服而祔大夫書封邑之券而納諸棺皆非禮矣大音泰革音亟入聲陳乾昔寢疾屬其兄弟而命其子尊已曰如

縣音玄

我死則必大為我棺使吾二婢子夾我陳乾昔死其子

曰以殉葬非禮也況又同棺乎弗果殺

屬如周禮屬民讀法之屬猶合

也聚也記者善尊已守正而不從其父之亂命乾音干屬音燭

仲遂卒于垂壬午猶

繹萬入去籥仲尼曰非禮也卿卒不繹

仲遂魯莊公子東門襄仲也為

魯卿垂齊地名祭宗廟之明日又設祭禮以尋繹昨日之祭謂之繹殷謂之彤言壬午則正祭辛巳日也萬舞執干以舞也籥舞吹籥以舞也萬入去籥者言此繹祭時以仲遂之卒但用無聲之干舞以入去有聲之籥舞而不用也陳氏曰春秋之法當祭而卿卒則不用樂明日則不繹故叔弓之卒昭公去樂卒事君子以為禮仲遂之卒宣公猶繹而萬入去籥聖人以為非禮詩記曰萬舞二舞之總名也干舞者武舞之別名籥舞者文舞之別名文舞又謂之羽舞鄭氏據公羊以萬舞為干舞誤也春秋書萬入去籥言文武二舞皆入去其有聲者故去籥焉公羊乃以萬舞為武舞與籥舞對言之失經意矣若萬舞止為武舞則此詩何為獨言萬舞而不及文舞左傳考仲子之宮將萬焉婦人之廟亦不應獨用武舞也然則萬舞為二舞之總名明矣出詩緝簡

兮註 愚按左傳楚令尹子元欲盡文夫人為館於其
宮側而振萬焉夫人聞之泣曰先君以是舞也習戎備
也今令尹不尋諸仇讎而於未亡人之側不亦異乎據
此則萬舞信為武舞矣呂氏豈偶忘之耶 去上聲彤

音融何為
為去聲

季康子之母死公輸若方小斂般請以機封

將從之公肩假曰不可夫魯有初

公輸氏若名為匠師
方小年尚幼也斂下

棺於椁也般若之族素多技巧見若掌斂事而年幼欲
代之而試用其巧技也機窆謂以機闔轉動之器下棺
不用碑與緯也魯有初言魯國自有
故事也 般音班封音窆斂去聲 公室視豐碑三家

視桓楹

豐碑天子之制桓楹諸侯之制 疏曰凡言視
者此擬之辭豐大也謂用大木為碑穿鑿去碑

中之木使之空於空間著鹿盧兩頭各入碑木以紼之
一頭係棺緘以一頭繞鹿盧既訖而人各背碑負紼末

頭聽鼓聲以漸却行而下之也桓桓不似碑形如大楹耳通而言之亦曰碑說文桓郵亭表也如今之橋旁表柱也諸侯二碑兩柱為一碑而施鹿盧故鄭云四植也下空去聲著音勾般爾以人之母

嘗巧則豈不得以其母以嘗巧者乎則病者乎噫弗果

從

疏曰嘗試也言爾欲以人母嘗試已之巧事誰有強逼於爾而為此乎豈不得休已者哉又語之云其無

以人母嘗試已巧則於爾病者乎言不得嘗巧豈於爾有所病假言畢乃更噫而傷嘆於是衆人遂止一說

則豈不得以其母以嘗巧者乎作一句言爾以他人母試巧而廢其當用之禮則亦豈不得自以已母試巧而

不用禮乎則於爾心亦有所病而不安乎蓋使之反求諸心以已度人而知其不可也應氏曰周衰禮廢而

諸侯僭天子故公室之室棺視豐碑大夫僭諸侯故三

家之室棺視桓楹其陵替承襲之弊有自來矣

禮記集說

季九

聲戰于郎公叔禺人遇負杖入保者息曰使之雖病也

任之雖重也君子不能為謀也士弗能死也不可我則

既言矣與其鄰重汪錡往皆死焉魯人欲勿殤重汪錡

問於仲尼仲尼曰能執干戈以衛社稷雖欲勿殤也不

亦可乎

戰于郎魯哀公十一年齊伐魯也禺人昭公子公為也遇魯人之避齊師而入保城邑者疲僂

之餘負其杖而息于塗禺人乃歎之曰徭役之煩雖不能堪也稅斂之數雖過於厚也若上之人協心以禦寇

難猶可塞責也今卿大夫不能畫謀策士不能捐身以死難豈人臣事君之道哉甚不可也我既出此言矣可

不思踐吾言乎於是與其鄰之童子汪錡者皆往闕而死於敵魯人以錡有成人之行欲以成人之喪禮葬之

而孔子善其權禮之當也

馬音遇

子路去魯謂顏淵

重通作童 蹄音紀 斂去聲 數入聲

曰何以贈我曰吾聞之也去國則哭于墓而后行反其國不哭展墓而入謂子路曰何以處我子路曰吾聞之

也過墓則式過祀則下

哭墓哀墓之無主也不忍丘壟之無主則必有返國之期故為

行者言之墓與祀人所易忽也而能加之敬則無往而不用吾敬矣敬則無適而不安故為居者言之也

氏曰

凡物展之則可省而視故省謂之處上聲為去聲省悉井切

工尹商陽與陳奔

疾追吳師及之陳弃疾謂工尹商陽曰王事也子手弓

而可

句

手弓

句

子射諸射之斃一人輟弓又及謂之又

斃二人每斃一人揜其目止其御曰朝不坐燕不與殺

三人亦足以反命矣孔子曰殺人之中又有禮焉

工尹楚官

名追吳師事在魯昭公十二年子手弓而可為句使之執弓也手弓商陽之弓在手也韋弓衣也謂之再告之也掩目而不忍視止御而不忍驅有惻隱之心焉商陽自言位卑禮薄如此亦可以稱塞矣孔子謂其有禮以敗北之師本易窮而商陽乃能節制其縱殺之心是仁意與禮節並行非事君之禮止於是也特取其善於追敗者亦非謂臨敵未決而不忍殺人也疏曰朝與燕皆在寢若路門外正朝則大夫以下皆立若燕朝在於路寢則大夫坐於上如孔子攝齊升堂是也升堂則坐矣燕亦在寢燕禮獻卿大夫之後西階上獻士無升堂之文是士立於下也鄭註射者在左角在右御在中夾謂兵車參乘之法此謂凡常戰士若是元帥則在中

夾鼓下御者在左戈盾亦在右若天子諸侯親將亦居鼓下若非元帥則皆在左御者在中若非兵車則尊者

在左

射音石顛音暢朝音潮與去聲稱易並去聲齊音咨乘將並去聲

諸侯伐秦曹桓公

卒于會諸侯請含使之襲

曹伯之卒魯成公十三年也襲賤者之事諸侯從之不知

禮也

襄公朝于荆康王卒荆人曰必請襲魯人曰非

禮也荆人強之巫先拂柩荆人悔之

荆為貢州名楚立國之本號魯僖公

元年始稱楚魯襄公以二十八年朝楚適遭楚子昭之喪魯人知襲之非禮而不能違於是以前臨臣喪之禮先之及其覺之而悔已無及矣此其適權變之宜足以雪恥

強上聲

滕成公之喪使子

叔敬叔弔進書子服惠伯為介及郊為懿伯之忌不入

惠伯曰政也不可以叔父之私不將公事遂入

滕成公之喪在

魯昭公之三年敬叔魯桓公七世孫惠伯則桓公六世孫也於世次敬叔稱惠伯為叔父懿伯則惠伯之叔父而敬叔之五從祖進書奉進魯君之弔書也介副也劉氏曰左傳註云忌怨也敬叔先有怨於懿伯故不欲入滕以惠伯之言而入傳言叔弓之有禮也此疏云敬叔嘗殺懿伯為其家所怨怨惠伯殺已故不敢先入惠伯知其意而開釋之記惠伯之知禮也二說不同而皆可疑如彼註言禮叔為之避仇怨則當自受命之日辭行以禮之不當及郊而後辭入也如此疏言恐惠伯殺已而難之則魯之遣使而使其仇為之副不恤其相仇以棄命言事亦非善處也且叔弓為正使得仇怨為介而不請易之非計之得也又同使共事而常以仇敵備之而往反於魯滕之路亦難言也使叔果欲報仇則其言雖善安知非誘我耶而遂入又非通論也按左傳云

及郊遇懿伯之忌此作為二字雖異而皆先言及郊而後言忌可見是及郊方遇忌也或者忌字只是忌日懿伯是敬叔從祖適及滕郊而遇此日故欲緩至次日乃入故惠伯以禮曉之曰公事有公利無私忌乃先入而叔弓亦遂入焉此說固可通

哀公使人弔蕢尚遇諸道

辟於路畫宮而受弔焉

哀公魯君辟於路辟讀為闕謂除闕道路以畫宮室之位而受

弔也

辟音

闕畫音獲

曾子曰蕢尚不如杞梁之妻之知禮也齊

莊公襲莒于奪杞梁死焉其妻迎其柩於路而哭之哀

魯襄公二十三年齊侯襲莒襲者以輕兵掩其不備而攻之也左傳言杞殖華還載甲夜入且于之隧且于莒邑名隧狹路也鄭云或為兌故讀奪為兌梁即殖以戰死故妻迎其柩

奪音兌華去聲且音雖

莊公

使人弔之對曰君之臣不免於罪則將肆諸市朝而妻

妾執君之臣免於罪則有先人之敝廬在君無所辱命

肆陳尸也妻妾執拘執其妻孺子黷之喪哀公欲設撥

問於有若有若曰其可也君之三臣猶設之顏柳曰天

子龍輶而擗幬諸侯輶而設幬為榆沈故設撥三臣者

廢輶而設撥竊禮之不中者也而君何學焉黷哀公之少子舊說

以撥為紼未知是否三臣魯之三家也顏柳言天子之
殯用輶車載柩而畫轅為龍擗幬者叢木為輶形而覆
幬其上前言加斧于擗上是也諸侯輶而設幬則有輶
而無龍有幬而無擗也榆沈以水浸榆白皮之汁以播

地取其引車不溢滯也今三家廢輶不用而猶設撥是徒有竊禮之罪而非有中用之實者也方氏曰為輶之重也故為榆沈以滑之欲榆沈之散也故設撥以發之無輶則無所用沈無所用沈則無所用撥三臣既知輶之可廢而不知撥之不必設是竊禮之不中者也撥雖無所經見然以文考之為榆沈故設撥則是以手撥榆沈而灑於道也先儒以為緇失之矣今按方說如此亦未知其是否闕之可也輶他昆切撥半末切輶音春情音道為去聲榆音于沈音審中去聲悼公之母死哀公為之齊衰有

若曰為妾齊衰禮與公曰吾得已乎哉魯人以妻我妻

我以為我妻也此哀公溺情之舉文過之辭疏曰天子諸侯絕旁期於妾無服惟大夫為貴戚總為去聲

聲天去季子臯葬其妻犯人之禾申祥以告曰請庚之子

臯曰孟氏不以是罪予朋友不以是弃予以吾為邑長

於斯也買道而葬後難繼也

劉氏曰季子臯孔子弟子高柴也夫子嘗曰柴也愚

觀家語所稱及此經所記泣血三年及成人為哀之事觀之賢可知矣此葬妻犯禾亦為成宰時事有無固不可知然曰孟氏不以是罪予朋友不以是弃予者以犯禾之失小而買道之害大也何也以我為邑宰尚買道而葬則後必為例而難乎為繼者矣此亦愚而過慮之一端然出於誠心非文飾之辭也鄭註謂其恃寵虐民而方氏又加以不仁不恕之說則甚矣

豈有賢如子臯而有是哉

文去聲

仕而未有祿者

君有饋焉曰獻使焉曰寡君違而君薨弗為服也

王制云位

定然後祿之此蓋初試為士未賦廩祿者有饋於君則稱獻出使他國則稱寡君此二事皆與羣臣同獨違離

之後而君薨則不為舊君服此則與羣臣異所以然者以其未嘗食君之祿也

方氏曰湯之於伊尹學焉而後

臣之方其學也賓之而弗臣此所謂仕而未有祿者若孟子之在齊是也惟其賓之而弗臣故有饋焉不曰賜而曰獻將命之使不曰君而曰寡君蓋獻為貢上之辭而寡則自謙之辭故也以其有賓主之道而無君臣之禮故違而君薨弗為服也其曰違則居

虞而立尸有几

使為並去聲

筵

未葬之前事以生者之禮葬則親形已藏故虞祭則立尸以象神也

筵席也大歛之奠雖有席而無几此

時則設几與

卒哭而諱生事畢而鬼事始已

卒哭而諱其名蓋事

筵相配也

生之禮已畢事鬼之事始矣已語辭

既卒哭宰夫執木鐸以命于宮曰舍

故而諱新自寢門至於庫門

周禮大喪小喪宰夫掌其戒令故卒哭後使宰夫執

金口木舌之鐸振之以命令于宮也其令之之辭曰舍故而諱新故謂高祖之父當遷者諱多則難避故使之舍舊諱而諱新死者之名也以其親盡故可不諱庫門自外入之第一門亦曰臯門舍上聲

二名不

偏諱夫子之母名徵在言在不稱徵言徵不稱在

二名二字

為名也此記避諱之禮

軍有憂則素服哭于庫門之外赴車不載

橐韞

橐甲衣韞弓衣甲不入橐弓不入韞示再用也方氏曰戰勝而還謂之愷則敗謂之憂宜矣素服

哭以喪禮處之也必於庫門之外者以近廟也師出受命于祖無功則於祖命辱矣赴車告赴於國之車凡告喪曰赴車以告敗為名有焚其先人之室則三日哭故與素服同義

素音高

曰新宮火亦三日哭

先人之室宗廟也魯成公三年焚宣公之廟神主初入故曰新宮春

秋書二月甲子新宮災三日哭註云書其得禮此言故曰者謂春秋文也孔子過泰山側有

婦人哭於墓者而哀夫子式而聽之使子路問之曰子

之哭也壹似重有憂者而曰然昔者吾舅死於虎吾夫

又死焉今吾子又死焉夫子曰何為不去也曰無苛政

夫子曰小子識之苛政猛於虎也聞其哭式而聽之與見齊衰者雖狎必變

之意同聖人敬心之所發蓋有不期然而然者壹似重有憂者言甚似重疊有憂苦者也而曰乃曰也虎之殺人出於倉卒之不免苛政之害雖未至死而朝夕有愁思之苦不如速死之為愈此所以猛於虎也為人上者可不知此哉重平魯人有周豐也者哀公執摯請見

聲識音志卒音猝

之而曰不可公曰我其已夫使人問焉曰有虞氏未施
信於民而民信之夏后氏未施敬於民而民敬之何施
而得斯於民也對曰墟墓之間未施哀於民而民哀社
稷宗廟之中未施敬於民而民敬殷人作誓而民始畔
周人作會而民始疑苟無禮義忠信誠懇之心以涖之
雖固結之民其不解乎

周豐必實而隱者故哀公屈已見之乃曰不可者蓋古者不為

臣不見故不敢當君之臨見也我其已夫已止也不強其所不願也有心之固結不若無心之感乎其言甚正但大禹征苗已嘗誓師誓非始於殷也禹會諸侯於塗山會亦不始於周也此言誓之而畔會之而疑則始於

殷周耳 摯音至 解佳買切 强上聲 喪不慮居 毀不危身 喪不慮居 為無

廟也 毀不危身為無後也

劉氏曰喪禮稱家之有無不可勉為厚葬而致有敗家之

慮家廢則宗廟不能以獨存矣 毀不減性不可過為哀毀而致有亡身之危以死傷生則君子謂之無子矣此二者皆所以防賢者之過禮 為去聲 稱去聲 延陵季子適齊於其反也 其長

子死葬於贏博之間 孔子曰延陵季子吳之習於禮者

也 往而觀其葬焉

吳公子札讓國而居延陵故曰延陵季子 贏博齊二邑名

其坎深

不至於泉 其斂以時服 既葬而封 廣輪揜坎 其高可隱也 既封左袒右還其封且號者三 曰骨肉歸復于土命

也若魂氣則無不之也無不之也而遂行孔子曰延陵

季子之於禮也其合矣乎

不至於泉謂得淺深之宜也時服隨死時之寒暑所衣也

封築土為墳也橫曰廣直曰輪下則僅足以拑坎上則纔至於可隱皆儉制也左袒以示陽之變右還以示陰之歸骨肉之歸土陰之降也魂氣之無不之陽之升也陰陽氣也命者氣之所鍾也季子以骨肉歸復于土為命者此精氣為物之有盡謂魂氣則無不之者此遊魂為變之無方也壽夭得於有生之初可以言命魂氣散於既死之後不可以言命也再言無不之也者慰傷離訣之至情而冀其魂之隨已以歸也不惟適旅葬之節而又且通幽明之故宜夫子之善之也然為疑辭而不為決辭者蓋季子乃隨時處中之道稱其有無而不盡拘乎禮者也故夫子不直曰季子之於禮也合矣而必加其乎二字使人由辭以得意也讀者詳之 石梁王

氏曰還與環同 深去聲封如字廣
隱並去聲號平聲處上聲稱去聲

邾婁考公之喪徐

君使容居來弔含曰寡君使容居坐含進侯玉其使容

居以含

考公之喪徐國君使其臣容居者來弔且致珠

邾君侯玉者徐自擬天子以邾君為己之諸侯言進侯

氏以玉也其使容居以含者容居求即行含禮也 疏

曰凡行含禮未斂之前士則主人親含大夫以上即使

人含若斂後至殯葬有來含者親自致璧於柩及殯上

者謂之親含若但致命以璧授主人主人受之謂之不

聲

有司曰諸侯之來辱敝邑者易則易于則于易于雜

者未之有也

邾之有司拒之言諸侯之辱來邾國者人

臣來而其事簡易則行人臣簡易之禮人

君來而其事廣大則行人君廣大之禮于猶迂也有廣遠之意今人臣來而欲行人君之禮是易于相離矣我國未有此也

易音異

容居對曰容居聞之事君不敢忘其君亦

不敢遺其祖昔我先君駒王西討濟於河無所不用斯

言也容居魯人也不敢忘其祖

容居又答言事君者不敢忘其君我奉命如此

今不能行是忘吾君也為人子孫當守先世之訓故亦不敢遺吾祖也居蓋徐之公族耳且言昔者我之先君駒王濟河而西討無一處不用此稱王之言自言其疆土廣大久已行王者之禮也又自言我非譎詐者乃魯鈍之人是以不敢忘吾祖欲邾人之信其言也此著子徐國君臣之僭且明邾有司不能終正當時之僭也

思之母死於衛赴於子思子思哭於廟門人至曰庶氏

之母死何為哭於孔氏之廟乎子思曰吾過矣吾過矣

遂哭於他室

伯魚卒其妻嫁於衛之庶氏嫁母與廟絕族故不得哭之於廟

天子崩三

日祝先服五日官長服七日國中男女服三月天下服

疏曰祝大祝商祝也服服杖也是喪服之數故呼杖為服祝佐含斂先病故先杖也故子亦三日而杖官長大夫士也病在祝後故五日國中男女謂畿內民及庶人在官者服齊衰三月而除必待七日者天子七日而殯殯後嗣王成服故民得成服也三月天下服者謂諸侯之大夫為王總衰既葬而除近者亦不待三月今據遠者為言耳何以知其或杖服或衰服按喪大記及喪服四制云云然四制云七日授士杖此云五日士杖者崔氏云此據朝廷之士四制言邑宰之士也

大音泰為王為去聲

虞人致百祀之木可

以為棺槨者斬之不至者廢其祀刳其人

虞人掌山澤之官也天子

之棺四重而槨周焉亦奚以多木為哉畿內百縣之祀其木可用者悉斬而致之無乃太多乎畿內之美材固不乏矣奚獨於祠祀斬之乎廢其祀刳其人又何法之峻乎禮制若此未詳其說一云必命虞人致木不用命者然後國有常刑虞人非一未必盡命之也齊大饑黔敖為食於路以待餓

者而食之有餓者蒙袂輯屨貿貿然來黔敖左奉食右執飲曰嗟來食揚其目而視之曰予唯不食嗟來之食以至於斯也從而謝焉終不食而死曾子聞之曰微與其嗟也可去其謝也可食

蒙袂以袂蒙面也輯屨輯斂其足言困憊而行蹇也貿貿

垂頭喪氣之貌嗟來食歎閔之而使來食也從就也微與猶言細故末節謂嗟來之言雖不敬然亦非大過故其嗟雖可去而謝焉則可食矣食之食音嗣餘並如字輯音集賢音茂奉上聲與平聲喪去聲邾婁

定公之時有弑其父者有司以告公瞿然失席曰是寡

人之罪也曰寡人嘗學斷斯獄矣臣弑君凡在官者殺

無赦子弑父凡在官者殺無赦殺其人壞其室洿其宮

而豬焉蓋君踰月而后舉爵

瞿然驚怪之貌在官者諸臣也在官者家人也天下

之惡無大於此者是以人皆得以誅之無赦之理惟父有此罪則子不可討之也君不舉爵以人倫大變亦教化不明所致故傷悼而自貶耳疏曰豬是水聚之名石梁王氏曰註疏本作子弑父凡在官者殺無赦

為是瞿音屨斷丁晉獻文子成室晉大夫發焉張老

玩切壞音怪誇音烏

曰美哉輪焉美哉奐焉歌於斯哭於斯聚國族於斯文

子曰武也得歌於斯哭於斯聚國族於斯是全要領以

從先大夫於九京也北面再拜稽首君子謂之善頌善

禱晉獻舊說謂晉君獻之謂賀也然君有賜於臣豈得

言獻疑獻文二字皆趙武謚如貞惠文子之類諸大

夫發禮往賀記者因述張老之言輪輪國高也奐奐

爛衆多也歌祭祀作樂也哭死喪哭泣也聚國族燕集

國賓聚會宗族也頌者美其事而祝其福禱者祈以免

禍也張老之言善於頌武子所答善於禱也鄭氏曰

晉卿大夫之墓地在九原疏曰領頸也古者罪重腰

斬罪輕頸刑先大夫文子父祖也石梁王氏曰歌於

斯謂祭祀歌樂也大夫祭無樂春秋時或有之

要平聲京古原字

仲尼之畜狗死使子

貢埋之曰吾聞之也敝帷不棄為埋馬也敝蓋不棄為埋狗也丘也貧無蓋於其封也亦予之席毋使其首陷

焉

狗馬皆有力於人故特示恩也

路馬死埋之以帷

謂君之乘馬死則特以帷埋之不用敝帷也

季孫之母

方氏曰魯昭公乘馬墜而死以帷裹之

死哀公弔焉曾子與子貢弔焉閭人為君在弗內也曾

子與子貢入於其廐而脩容焉子貢先入閭人曰鄉者

已告矣曾子後入閭人辟之

鄉者已告言先已告於主人矣

為去聲內入聲鄉

去聲辟
音避

涉內雷卿大夫皆辟位公降一等而揖之君子

言之曰盡飾之道斯其行者遠矣

內雷門屋後簷也行者遠猶言感動之大

也劉氏曰此章可疑二子弔卿母之喪必自盡禮以造門不當待閭者拒而後脩容盡飾也且旣至而閭人辭或當再請於閭若終不得通退可也何必以威儀悚動之以求入耶其入而君卿大夫敬之者以平日知其賢也非素不相知創見其容飾之美而加敬也而君子乃曰盡飾之道斯其行者遠則是二子之德行不足以行遠惟區區之外飾乃足以行遠耶
辟音避造七到切陽門之介夫死司城子罕

入而哭之哀晉人之覘宋者反報於晉侯曰陽門之介

夫死而子罕哭之哀而民說殆不可伐也

陽門宋之國門名介夫甲

士之守衛者宋武公諱司空改其官名為司城
子罕樂喜也戴公之後覲聞視也說音悅孔子聞

之曰善哉覲國乎詩云凡民有喪扶服救之雖微晉而

已天下其孰能當之

孔子善之以其識治體也詩邶風谷風之篇扶服致力之義微無也

夫子引詩而言宋國雖以子罕得人心可無晉憂而已
然天下亦孰能當之甚言人心之足恃也一說微弱也
雖但弱晉之強使不敢伐而已然推此意則民既悅服
必能觀其上死其長而舉天下莫能當之矣前說為是

扶服音匍匐

魯莊公之喪既葬而經不入庫門士大夫既卒

哭麻不入

莊公為子般所弑而慶父作亂閔公時年八歲經葛經也諸侯奔經葛而葬葬畢閔公即

除凶服於庫門之外而以吉服嗣位故云經不入庫門也士大夫則仍麻經直俟卒哭乃不以麻經入庫門蓋

閔公既吉服不與虞與卒哭之祭故羣臣至卒哭而除
記禍亂恐迫禮所由廢為去聲般音班父音甫不與

與去聲孔子之故人曰原壤其母死夫子助之沐椁原壤

登木曰久矣予之不託於音也歌曰貍首之斑然執女
手之卷然夫子為弗聞也者而過之從者曰子未可以

已乎夫子曰丘聞之親者毋失其為親也故者毋失其

為故也或問朱子原壤登木而歌夫子為弗聞而過之

待之自好及其夷俟則以杖叩脛莫太過否曰

這說却差如壤之歌乃是大惡若要理會不可但已只

得且休至其夷俟之時不可不教誨故直責之復叩其

脛自當如此若如今說則是不不要管他却非朋友之道

矣胡氏曰數其母死而歌則壤當絕叩其夷踞之脛

則壤猶故人耳盛德中禮見乎周旋此亦可見馮氏
曰母死而歌惡有大於此者乎宜絕而不絕蓋以平生
之素而事有出於一時之不意者如此善乎朱子之言
曰若要理會不可但已只得且休其有以深得聖人之
處其所難處者矣劉氏曰原壤母卒夫子助之治椁
壤登已治之椁木而言久矣我之不託興於詠歌之音
也如狸首之斑言木文之華也卷與拳同如執女手之
舉言沐椁之滑膩也壤之廢敗禮法甚矣夫子佯為不
聞而過去以避之從者見其無禮疑夫子必當已絕其
交故問曰子未當已絕之乎夫子言為親戚者雖有非
禮未可遽失其親戚之情也為故舊者雖有非禮未可
遽失其故舊之好也比聖人隱惡全交之意卷音拳
從去聲數上聲中去聲見
乎見音現處上聲興去聲
趙文子與叔譽觀乎九原文
子曰死者如可作也吾誰與歸

文子晉大夫名武叔譽
叔向也言卿大夫之死

而葬於此者多矣假令可以再生而起吾於衆大夫誰從乎文子蓋設此說欲與叔向共論前人賢否也令

平叔譽曰其陽處父乎文子曰行并植於晉國不沒其

身其知不足稱也

處父晉襄公之傅并者兼衆事於已

如此故為孤射姑所殺不得善終其身是不智其舅犯

也處上聲并去聲植直吏切知去聲射音亦

其舅犯

乎文子曰見利不顧其君其仁不足稱也

言子犯從文公十九年于外及反國危疑之時當輔之入以定其事乃及河而授璧以辭此蓋為他日高爵重

祿之計故以此言要君求利也豈顧其君之安危哉是不仁也為去聲要平聲我則隨武子

乎利其君不忘其身謀其身不遺其友晉人謂文子知

人文子自言我所願歸者惟隨武子乎武子士會也食邑於隨左傳言夫子之家事治言於晉國無隱情蓋

不忘其身而謀之知也利其君不遺其友皆仁也文子其中退然如不勝衣其

言呐呐然如不出諸其口

中身也見儀禮鄉射記退然謙卑怯弱之貌呐呐聲低而

語緩也如不出諸其口似不能言者勝平聲呐如劣切

所舉於晉國管庫之士七

十有餘家生不交利死不屬其子焉

管鍵也即今之鎖庫之藏物以管為

開閉之限管庫之士賤職也知其賢而舉之即不遺友之寶雖有舉用之恩於其人而生則不與之交利將死

亦不以其子屬託之廉潔之至屬音燭叔仲皮學子柳叔仲皮死其妻魯

人也衣衰而繆經叔仲衍以告請總衰而環經曰昔者

吾喪姑姊妹亦如斯未吾禁也退使其妻總衰而環經

繆絞

也謂兩股相交五服之經皆然惟吊服之環經一

股

疏曰言叔仲皮教訓其子子柳而子柳猶不知禮

叔仲皮死子柳妻雖是魯鈍婦人猶知為舅著齊衰而

首服繆經衍是皮之弟子柳之叔見當時婦人好尚輕

細告子柳云汝妻何以著非禮之服子柳見時皆如此

亦以為然乃請於衍令其妻身著總衰環首服環經衍又

答云昔者吾喪姑姊妹亦如此總衰環經無人相禁止

也子柳得衍此言退使其妻著總衰而環經學音效

衣音咨

繆音

繆音

歲

成人有其兄死而不為衰者聞子臯將為

成宰遂為衰成人曰蠶則績而蟹有匡范則冠而蟬有

綏兄則死而子臯為之衰

成魯邑名匡背殼似匡也范

蜂也朱氏曰絲之績者必

朱氏曰絲之績者必

由乎匡之所盛然蟹之有匡非為蟹之績也為背而已
首之冠者必資乎綏之所飾然蟬之有綏非為范之冠
也為喙而已兄死者必為之服衰然成人之服衰非為
兄之死也為子臯而已蓋以上二句喻下句也 綏而
追切盛平聲註 樂正子春之母死五日而不食曰吾悔
中為並去聲

之自吾母而不得吾情吾惡乎用吾情

子春曾子弟子
矯為過制之禮

而不用其實情於母則他無
所用其實情矣此所以悔也

歲旱穆公召縣子而問然

曰天久不雨吾欲暴尫而奚若

左傳註云尫者瘠病之
人其面上向暴之者冀

天哀之而雨也
步卜切下二節同尫音汪

雨去聲暴

曰天則不雨而暴人之疾

子

句
虛句

母乃不可與

此言酷虐之事非所
以感天

與平聲 然則吾欲

暴巫而奚若

巫能接神冀神閔之而雨

曰天則不雨而望之愚婦人

句於以求之母乃已疏乎

於以求之猶言於此求之也已疏言甚迂濶也徙市

則奚若曰天子崩巷市七日諸侯薨巷市三日為之徙

市不亦可乎


徙移也言徙市又言巷市者謂徙交易之物於巷也此庶人為國之大喪憂戚罷市

而日用所須又不可缺故徙市於巷也今旱而欲徙市者行喪君之禮以自責也縣子以其求之已而不求諸人故可其說然豈不聞僖公以大旱欲焚巫尪聞臧文仲之言而止縣子不能舉其說以對穆公而謂徙市為可則亦已疏矣孔子曰衛人之祔也離之魯人之祔也合

之善夫

生既同室死則同穴故善魯疏曰祔合葬也離之謂以一物隔二棺之間於樽中也魯人則

合並兩棺置槨中無別物隔之 朱子曰古者槨合衆材為之故大小隨人所為今用全木則無許大木可以為槨故合葬者只同穴而各用槨也



禮記集說卷二